

國

朝

文

匯

國朝文匯乙集目錄

卷十一

張

庚

字瓜田號浦山浙江秀水人布衣乾隆丙辰薦舉博學鴻詞有惺恕齋集

觀虎說

一

書死守孤城狀後

一

愧草軒記

二

鮑志周傳

二

西湖二先生傳

三

二曲先生傳

五

劉崑傳

六

李襄水傳

七

馮李兩孝廉傳

八

翁氏兩孝子傳

九

書焦存兒事

十

王

垣

字紫亭陝西蒲城人乾隆辛酉舉人有嘯雪堂集

遊雲詩集序

十一

陳

朗字太暉號青柯浙江平湖人乾隆三十四年進士官江西撫州府知府著有青柯館集

陸梅谷夢影詞敘

十二

金

姓字雨叔浙江仁和人乾隆壬戌一甲一名進士官至吏部侍郎

孝節夏孺人傳

十三

竇光鼎

字元調號東皋山東諸城人乾隆壬戌進士官至左都御史有省吾齋集

永康縣學宮建修碑記

十四

關帝廟碑

十四

永濟縣知縣王君墓誌銘

十五

河南南汝光道張君墓誌銘

十六

朱稻孫

字稼翁號娛村浙江秀水人竹垞先生孫貢生考授州判乾隆丙辰薦舉鴻博

鄒城先生墓誌銘

十八

鄭虎文

字炳也號誠齋浙江秀水人乾隆壬戌進士官左贊善有吾松閣集

金陀薈萃序

十九

松溪書屋圖序

二十

沈定夫詩序

二十

黃敝遊草序

二十一

書潛山尋墓記後

二十三

汪霖傳

二十三

翰林院編修叔山邵君墓誌銘

二十四

韓烈婦墓誌銘

二十六

國朝文匯乙集卷十一

觀虎說

張庚

乾隆甲子冬十月。睢州東關集市上。檻虎一人爭觀之。湯子見觀者衆。因感麟鳳若至。觀者又當何如。為作觀虎說。問余。湯子之觀物也。遠矣。雖然。虎猛獸也。貪暴殘忍。以為性。常則食羴麋鹿。狐狸羗羊等物。變則食人。故人一聞虎之名。即不必見其形。而怵怵凜凜以畏。一旦受制於檻。昇至於閭閻。宜乎人爭觀其形。欲一悉其猛態也。若夫麟。仁獸也。鳳。神鳥也。出亦不妄。出惟聖者知之。凡夫詎能識之。而羣觀之哉。我以為駝峰繪水間。即有麟鳳常遊之人。亦以常獸常鳥遇之矣。豈復有觀之者哉。而湯子以為觀之者。必更甚於觀虎。噫。使麟鳳果有於駝峰繪水間。我猶恐湯子以常獸常鳥遇之。湯子乃慮衆人之不勝觀也耶。且麟鳳豈亦真人觀也耶。

書死守孤城狀後

美玉人所寶也。當其為璞。求玉者不顧也。見燕石於棧估者。則市焉。今夫驥良馬也。人之求之亦急矣。及遇之鹽車。又趨而過之矣。為之駕鹽車也。而驚駘反被以千金。裝馬。嗚呼。和樂不恆有。玉之終於璞。驥之老於鹽車。不知幾何矣。明末闖禍中原。朝廷之急將。甚於美玉良馬。冀翅萬萬。而特擢者。專任者。皆燕石也。驚駘也。而良將終

為璞之藏鹽車之困。若閻典史應元。豈非其人哉。當典史任江陰時。禦江盜有功。巡撫上其狀。以欽都司掌巡。此崇禎十四年也。久之。仍循資遷主簿。未幾。明社覆。金陵破。典史明知江南無主矣。然猶激於忠義。奮其智勇。與代者陳明選堅守江陰八十餘日。而以死殉。今讀黃晞所狀。其應變方略。出奇不窮。豈非一時名將哉。當時巡撫既上其禦盜功。使破例舉之。廟堂破例任之。其忠義足以激同官。智勇足以合諸將。天下事非必無濟也。奈何以資格棄之。不得盡其才於可為之日。而徒成其仁于時去之後。悲夫。抑明世資格之重。屈抑賢才。又豈獨一閻應元。嘉靖間倭寇東南。會稽典史吳成器者。率士卒遮擊于龍山。盡殪之。未幾。又破賊於曹娥江。大小凡數十戰。皆捷。每戰身先之。進止俱有方略。所部無秋毫犯。以限資格不得顯擢。改武職。由是思之。賢才之困於資格。可勝歎哉。昔太祖以布衣起定天下。士皆取於草莽。馬上得天下。不能以馬上治。自當設科取士。孰知久久偏重。進士之局遂成。以至牢不可破。他途進者。縱良才必抑之。蘇觀生以諸生保舉官。至戶部員外郎。京師陷後。流離至廣會。丁楚魁等將立永明王。觀生與共事。呂大器以其非進士叱辱之。噫。茲何時耶。猶論資格也。邵青門嘗云。二百八十年。無恙之金甌。破碎于千百庸進士之手。原其心。宗社可覆。君父可亡。而進士之局。必不可破。其言雖似激。以閻陳吳三典史觀。

之誠非過也。操用人之柄者鑒之。慎毋乘駑駘既蹶而怨無良馬也。

愧草軒記

張子永祐名其讀書之室曰愧草軒。而謂余曰。某坐軒下。見庭草自甲坼勾萌。以至丰茸蓊鬱。而花而實。其氣之隆隆勃勃。蓋無瞬息或止也。夫人與草同受天地之氣也。乃或朝勵夕止。往苒怠緩。曾不若草之憤發奮興。不肯自負于天地。我誠愧之。因題以自警。幸先生推此意為記。以揭諸壁。余聞之不禁喟然歎曰。有是哉。顧子之意言已賅矣。庸何推。雖然。余猶憶少時。裁月季于甌盎。冬月發兩萼。未幾霜蒙之。既而雪覆之。冰凍之。則以為瘁矣。迨春陽漸舒。雪消冰釋。而蓓蕾如故。至二月陽氣暢達。而始花。花大于拳。其瓣繁密。其色濃豔。入春而發者。迥不及也。因慨士君子當貧賤困苦顛沛流離。而能自力。則其成也。必大異於安常處順者。慎毋為茲花愧也。嗟乎。去者不可追。來者復膠轕穴擾。又氣血日衰薺。猶草入三秋甯復望其發榮滋長耶。念之未嘗不汗背。今子方年壯盛。正春陽始暢時。既知草之足愧。亦惟在勉之而已。倘他日悔恨如余之今日焉。是又多此軒之一名矣。

鮑志周傳

鮑志周字景瀛。杭州餘杭縣人。性至孝。幼喪父。泣血苦出。後讀書鄉塾。常往哭於墓。

一日晚歸。母見目赤腫。疑同塾角戲痛斥之。後家人見其哭墓。泣曰。昨何不言。曰。恐傷母心也。年十九。補弟子員。旋食餼。雍正七年。拔貢咸均。八年冬。簡往陝西。明年攝邠州淳化縣。淳自明季殘於寇。今猶未蘇。志周極意撫循之。宿弊悉除。冬。饑。民謀徙。志周親往稽戶口。計常社兩倉。儲穀足支四月。則麥期近。乃屬耆老告以毋轉溝壑。為之泣。民亦泣。由是無出疆者。肅州需軍米。檄淳三千石。志周發穀屬民領碾。不以役督。曰。差役即擾民。何堪。米竟先期交運。陝甘兩省多荒地。雍正間。議令三年墾復。十年升科。淳前令已申報可墾者千數百頃。志周知地瘠。現耕者尚多。三年一易。謂之歇地。況久荒乎。擇稍可墾者。援折算例。請於上官。入告報可。時州牧難之。志周堅持。竟得請。退語人曰。我別母之官。毋訓我愛民如子。不愛民。是負母訓也。治淳未二載。前流徙蜀漢間者。咸歸業。以內艱歸。乾隆四年。服闕。赴補時。河南雨災。奉命往協賑務。賑考城。考城令以君故得上考。明年補濬縣。治濬如治淳。中丞雅爾圖器之。調祥符甫受事。管河同知移書刻期徵民夫四百。志周以非公檄。不應。六年。江南災。明年。

上命移河南米麥協濟。米須碾運。府倉七千石。縣倉九千石。事孔亟。會城碾戶盡役於府。志周赴朱仙鎮集米商告曰。舊例照折起運。贏歸官。今以官穀照折易爾米。贏

歸爾衆。懽諾不日以足。麥購於市。他邑民皆苦之。志周潛以人雜諸商賈。市糴數足。而民不知。中丞雅爾圖榜其堂曰。循良師表。旋擢本府清軍鹽捕同知。未弔月。攝彰德府。整率有方。中丞益賢之。復榜其堂曰。治擬龔黃。題請知衛輝府。部以非題缺議。駁中丞。仍檄署之。會畿南二麥歉收。移文河南郡邑備貯。衛郡責糴八萬。志周置之屬邑數請曰。無庸。境內商販赴彼。日數千石。食自足。不外需矣。一經官購。則當截商。商截則市價必昂。鄰民未濟。我民先病。且麥不可久貯。勢必借糶易穀。不滋累乎。已而果不需麥。九年得代。返汴。疾作。遂卒。年四十有八。志周公明清敏。坦懷接物。出之肫肫。其性也在濶化時。有重囚周龍穴獄亡。法曹掾報入。志周亟命掩捕。時例禁嚴。限滿不獲。落職協緝。翌日。邑民知之。恐循吏去。各自起丁男四出佐緝。有三原民故健步。能索叛亡。一日過濶村里。惟見婦女。怪之。詢由。或告以故。其人曰。此非濶人所。能。吾當密偵之。婦女聞之。圍繞爭脫簪珥。賂之致罪。未幾果獲。其令祥符也。有黑衣人自稱尉氏縣捕役子。緣張某姦彭某妻。因謀死親夫事。父捕未獲。勒限重比。婦現居臬署旁。張現充臬署庖人。丐公逮之。志周即帶黑衣人往獲。訊不諱。黑衣人曰。有天矣。言訖不見。彭係贅者。乾隆四年水災。夫婦逃荒。往中年。依姪不能存。復轉徙道逢張姦其婦。以翦股藏贅者。姪証語合。獄成。移尉氏。事猶未發覺。黑衣人者。鬼為訴。

也。至今汴人猶傳異云。公宦十載。貧如故。中丞雅公去。碩色代。聞之太息。語僚屬。賻之。兩河士庶爭哭賻。喪得歸。子二。長斌。次宸。錦。

張庚曰。昔孫樵書。何易于事數則。史官據之。入循吏傳。其言質。為可信也。余與鮑君皆浙人。里居阻迴。生未之識。乾隆己巳來汴。士民及官茲土者。籍籍稱之。近有自關中來者。亦述其治行。名豈虛附哉。餘姚周君燦如。僑居大梁。次其政績。乞余傳書之。備史家採擇焉。

西湖二先生傳

西湖二先生者。沈子朗思。應子潛齋也。兩先生志合方同。為石交。皆杭之仁和人。庚每過武林。對西湖山色。未嘗不想見其高風。故稱西湖二先生。

沈朗思名蘭先。字甸華。後更名昀。而字曰朗思。年十六。受知於學使黎元寬。時武林有讀書社。小築社。登樓社。皆尚詞章。朗思在諸社。亦有名。及聞蕺山劉忠正公宗周講學越中。朗思往聽講學。以誠敬為主。應潛齋和之。而學遂盛。甲申之變。朗思年二十七。即棄衫服。刻苦自守。聞四方有賢士。書姓名置夾袋。冀一見之。然不妄交。於取予尤介。授徒自給。三旬九食。以為常。嘗斷炊連日。摘馬蘭草食之。有聞之者。餽以米。辭其人固請。則固辭。既餓甚。加以宛轉辭謝。益困。遂仆於地。其人皇駭。攜米去。良久

魁長曰其意可感然適以困老子耳。潛齋歎曰。搗謙於辭受一節。自謂不苟。然視沈先生猶愧之。朗思以末世喪禮不講。重輯士喪禮說。薈萃先儒之言。定其可行者。以授弟子。陸寅又輯四子略。五子要書。家法論。升降論。言行錄。居求編。疏通簡要。不涉殘明講學之習。嘗徒步西陵。展戴山之墓。戴山歿後。弟子爭其宗旨。各有煩言。朗思曰。道在躬行。若滕口說。非師所望於吾曹也。疾革。門人問曰。夫子今日何如。曰。心中無一物。惟知誠敬而已。夜半卒。年六十三。無以為斂。潛齋經紀其喪。不知所出。涕泣不食。或問之。則曰。吾不敢輕受賻。祇以玷先生。潛齋弟子姚敬恆。趨問曰。如敬恆可斂先生乎。潛齋曰。子篤行。先生夙所許。殆可也。於是敬恆斂而葬之。湖上子二穀中純中。皆能守其學。

應潛齋。名搗。謙字嗣寅。學者稱潛齋先生。父尚倫。故孝子也。潛齋生而有文在手。曰八卦。左耳重輪。右目重瞳。少即以斯道為己任。及冠。作君子責自勉論。偕同志虞峻民。張伏生。蔣與恆。為狷社。取有所不為也。時大江以南。社事甚盛。狷社所淬勵者。不以文而以道。潛齋於同社沈朗思尤莫逆。母病。服勤數載。既昏。不入私室。仍侍母旁。母卒。除喪。始成禮。性坦白。表裏洞然。讀書實踐力行。几席整肅。倦則端坐瞑目。寤而起。則申申徐行。所居僅破風雨。簞瓢屢空。晏如也。一日見梁上白蛇墮地。曰。此兵象。

也。逃之山中。既遭疫亂。自以故國諸生。絕志進取。曰。今而後。惟正人心。以維世教。庶不負所生。於是盡心於著述。康熙戊午。合肥李天馥同里。項景翼以大科薦。潛齋與牀以告。有司曰。搗謙非敢卻聘。實不能行。范中丞承謨至。又將薦。遂稱廢疾。海甯令許酉山請主講席。造廬者再。不見。既而曰。是非中庸之道。扁舟往報。令大喜曰。先生其許我乎。潛齋曰。使君學道。但從事於愛人足矣。披口說者。適以長客氣也。令默然不怡。既出。即解維疾行。同里姜御史國南以視釐歸。於故舊皆有餽。嘗再致之。不受。一日遇潛齋於途。方盛暑。見其衣木棉之衣。歸以葛二端投之。曰。雅知先生不受人絲粟。然此區區聊以消夏。且非盜跖來也。潛齋謝曰。竒尚有絺綌。昨偶感寒。欲其汗耳。君意良厚。實不需此。卒不受。卒年六十有九。潛齋尤精于易。其論伏羲之易。乾在上。以天為主。得之不得。有命。非人之所能為也。先天之事也。後天之易。作于文王。離在上。以心為主。死壽不二。修身以俟之。易凶為吉。所以立命也。故所著周易集解。皆有得之言。他如詩傳翼書傳拾遺。春秋傳考禮樂彙編。古樂書論孟拾遺。學庸本義。孝經辨定。性理大中。幼學養蒙編。朱子集要。教養全錄。各有精意。及潛齋集。共十四種。其無悶先生傳。則自述也。其高弟凌嘉印。字文衡。沈士則。字志可。傳其學。姚宏任。字敬恆。有篤行。即斂葬朗思者也。

贊曰。勵志故絕人。如西湖兩先生。洵堪伯仲哉。然而江河日下。脂韋隨俗。同志甯復有人。惜兩先生著作。塵埋蠹蝕。莫有問之者。其行誼亦誰復能言之。後有勵志者。請從兩先生之不怙於飢寒始。

二曲先生傳

先生姓李氏。名容。字中孚。別署二曲土室病夫學者。因稱二曲先生。西安藍屋縣人也。先世無達者。父可從。字信吾。以壯武從軍。為材官。崇禎壬午。督師汪喬年討關賊。赴襄城。信吾從監紀西安同知孫兆祿行。臨發。挾一齒。與其妻彭氏曰。如不捷。當委骨沙場。子其善教兒矣。時先生年十六。泣送於道。未幾。督師軍敗死之。信吾衛監紀不克。竝死之。士卒五千餘盡沒。彭聞報。乃與子以所遺齒葬之。曰。齒冢。先生屢欲之。襄城招魂以母老不敢遠出。康熙乙巳。母卒。辛亥。徒步至襄城。徧訪遺屍。不得。乃為文禱於社。服斬衰。晝夜號哭。不絕聲。繼以血。里諸生劉宗洙知之。即舍之家。具述父漢臣當喬年軍至襄。率邑人首迎。喬年署為贊畫。軍潰。賊獲而剽之。襄創收喬年屍。又捐資收全軍覆沒之屍。瘞之長坑。襄人於汪督師外。知有孫同知李材官。而不能別之於衆屍中。況又越三十載也。先生聞之。慟不欲生。知襄城縣張允中。重其孝。與宗洙議為信吾立祠。且造冢於故戰場。俾先生招魂以歸。宗洙即捐城西地一區。知

常州府駱鍾麟前令塾屋師事先生聞之遣使至襄城謂祠事未能旦夕竣請南下謁道南書院發願高諸公書以慰江左學者之慕先生赴之聽講者雲集凡開講於無錫於江陰於靖江於宜興晝夜不得息忽靜中涕下如雨捶胸頓足自誓曰不孝容汝此行為何事乃喋喋於此尚有人心者乎申旦不寐即戒行毘陵學者固留不能亟還襄城祠事適將畢遂宿祠下祝於父主前願以五千餘國殤之魂同返關中是夜將半鬼聲大作環祠不絕甚哀慘聞者驚異皆歎先生誠孝所感允中乃為先生設祭上則督師監紀配以信吾下設長筵徧及同時死者先生伏地痛哭凡襄城士民同時死難者之子孫畢至皆大哭觀者莫不哭哭聲四振於二三里外允中為之感泣於是立碑曰義林先生奉招魂之主取其冢土西歸告於母墓附之齒冢中更持服如初先生既少孤食貧力學奉母命不與試以昌明關學為己任嘗曰古今講學者各有宗旨愚則以悔過自新為要又曰諸儒之說醇駁相間去短集長在善讀之不然無問是朱是陸皆未能有得於道也當事請主關中書院先生方謀為馮恭定公設俎豆勉應之既而悔曰合六州鐵不足鑄此錯即去之陝撫軍白公欲薦之哀籲得免學使許公欲進其所著書不可歲癸丑總督鄂公以隱逸薦戊午司寇鄭公以海內真儒薦皆以病辭自後不復與人接惟吳中顧甯人至則款之

聖祖西巡總督傅公宣 旨召見先生稱廢疾 御書標志高潔四字寵之先生年四十以前嘗著十三經廿一史糾繆既而以為無當身心不復示人惟反身錄常示學者子慎言慎行皆能守父之志

贊曰庚少時讀先生遺書穆然想見其為人欲概其平生而恨無由後過襄城晤劉庶常芳草宗洙姪也遠悉先生始末引拜義林讀允中碑不覺涕下忠孝之感人殆有相深以天者歟宗洙父子前後仗義亦不可沒云

劉崑傳

劉崑字西來南昌人少孤任氣好鬪及博母屢責之卒不改母愀然曰我將逝我不忍見是子破我家禍及我且我死何以見亡者於地下崑聞之跪抱母膝而哭曰兒從此改行矣因重自誓母曰果爾是我志也自是崑折節讀書崑偉軀幹豐頤而髯洪聲重氣節順治十六年成進士授東鹿縣有能聲遷雲南府同知莅任例謁平西王吳三桂三桂器之數日有三桂客來言及雲南寒苦客曰盡資于王崑曰無以償也客曰何償為隨出示數紙皆大僚賣身券崑笑曰甚善但此身賣久矣客驚問崑曰己亥傳臚已責於

章皇帝也客愕謝去及三桂將叛崑見一吏屢變色疑其弄法給曰汝作如許大事

謂我不知耶。更恐叩頭乞屏左右白事曰。某有弟業鑄。入平西府鑄印。聞最大者為天下兵馬大元帥。崑即召其弟俱鑄之室。即馳白臬司李旋。隨李白撫軍。撫軍大驚曰。奈何。崑曰。事急矣。公速上聞。請大兵駐常德。賊不能出黔一步。無能為矣。若少遲賊至湖南。長江之險與國家共之。恐難撲滅也。撫軍曰。已聞而彼止奈何。崑曰。崑當其罪。撫軍曰。我與若恐頭不在頸矣。崑曰。今日頭猶思在頸乎。即代草疏書訖。促即發。撫軍猶豫稽數日。及發。未越境。為賊邏所得。而平西以反聞矣。殺撫軍等官。械李與崑赴勘。當崑之將就勘也。顧賊衆曰。取肩輿來。賊驚叱揮之走。崑曰。彼以劉同知為奇男子。我頭觸階死。彼不得一活。同知爾等安所逃罪。衆懼以肩輿昇往。偽官坐堂上。問女二人何言。李反覆數千言。不屈。崑以不作賊三字對。偽官復曰。若非明人乎。明且中興矣。崑曰。爾謊語耶。乞師我朝者誰。殺永歷於緬甸者誰。今猶言明中興乎。偽官曰。如女言。回旨。恐處分重。奈何。二人同聲應曰。誰欲輕者。遂羈二人於獄。李泣曰。君官小名未顯。且有老母。而不偷活。真奇男子也。我籍旂下一百口在京。不復顧矣。泣不已。崑曰。事至此。泣何益。劉崑死。當為厲鬼殺賊。三桂惜崑才。乃杖李及崑各四十。充軍成騰越衛。無何三桂死。崑謂李曰。三桂猾賊。恐成我二人名。故不殺。今豈復能容。盡避諸李。不肯。尋為賊所刺。崑避寶台山去。及大兵破雲南。綏遠將軍蔡

毓榮以二人孤臣抗節聞李贈卹。崑以原品加三級補登州府同知。通常德府致仕。張庚曰。公避地寶台山。時聞寺僧云。寺後三十餘里有曠土可耕。叢菁塞道久矣。公覓獼猴伐竹通道。如僧言。田之歲餘。獼猴以獸左肩餉。獼猴俗獵得獸。以此致禮主人。公隨至其地。獼猴指草屋大囤粟稻曰。皆公惠也。嗚呼。此可識公平日之為政矣。

李襄水傳

李襄水先生諱遙。字通齋。襄水其號也。睢州人。順治十六年進士。為彭澤令。吳三桂之姊之子陳隨母入黔。自揚州挾鹽私沽於道。至彭澤。襄水禁焉。陳怒。直入官署厲聲叱襄水曰。爾官粟米大。敢抗王親。襄水曰。抗云乎哉。吾且緝汝。顧左右立縛之。即具報各上官。三桂聞。移咨撫軍。撫軍飭縣釋陳。於是道路嘖嘖。稱李彭澤剛直有幹略。治彭四載。多惠政。以註誤去官。康熙十三年。三桂反。

上命順承王統兵鎮荊州。以總督蔡毓榮為綏遠將軍討之。復諭大臣保舉賢能。贊軍大司空翼如錫薦襄水。襄水至荊。謁將軍。問曰。爾進士也。烏乎長對曰。西南小醜不靖。朝廷破格掄才。唐裴中立。宋張乖崖亦進士也。一收復淮蔡。一蕩平吳蜀。儒士軍功。指不勝屈。顧用之何如耳。蔡竦然異之。遇以殊禮。久之。蔡曰。當陽為荊襄要道。軍事旁午。非遙莫辦。遂補當陽令。縣產煤。為軍中冶鑄所需。兩章京坐督煤戶。

採送每虧其直。少不遂。輒肆鞭笞。衆苦之。聞新令至。羣泣訴。襄水惻然。即據實申總督。報王。兩章京誣以庇煤戶。誤軍需。將置之理。王命吏刑兩部大人。讞之。讞之曰。大人出傳鼓。盛陳兵衛。皆露刃夾階侍立。部大人主兩章京言。盛怒。俟兩章京憤懣。冀詞誑。且先毆之。有頃。鼓止。礮發。軍門啟。急呼襄水入。旋呵令趨進。襄水徐及階下。大言曰。諸大人不欲滅吳逆乎。煤戶逃則無煤冶鑄。必廢。軍仗且不具。將何以殺賊。釋朝廷南顧憂。遙為朝廷非為煤戶也。問官語塞。令自陳王前。翌晨謁王。條悉如昨。且請於王曰。遙不合時宜。願以病去。王霽顏曰。女好官。我班師日。定奏女。當襄水初就讞也。民隨往者千餘人。及讞畢。出。民歡呼曰。非王孰能生全我賢令者。適有都統過當陽。襄水迎之。揖。都統曰。爾何官。不拜。對曰。縣令。昔汲黯以不拜大將軍重衛青。縣令今以汲黯自待耳。都統愕然。銜之。會邑有楊州彥者。襄水同年友也。以前任直隸任邳縣事。罪當流。襄水集士庶問曰。楊君於汝輩為戚黨。忍坐視乎。僉曰。楊君君子也。願為之募。未幾。襄水竟以楊事鐫二級去。咸謂都統媒孽云。襄水見楊事急走荊州。語水師總鎮張忠。忠故能詩。見襄水入楚。諸詩訂交者。聞語慨然起曰。君以楊失官。我獨不能為君募。以成此義舉乎。俄而新令至。錄楊家口將遣矣。襄水急倒篋質寶以拯之。楊卒得免。襄水在任僅九月。當民哭泣而送者。不絕於道。子二。初州庠。

員。康熙四十八年進士。改翰林。出知敘州。卒於官。中子叢。庠生。工繆篆。與余善。張庚曰。余聞冀公之薦先生。非有舊也。偶見先生學庸說。註駝峯草。使民實政錄。傾心焉。冀公可謂知人矣。乃蔡督知之。用不能盡其才。順承知之。卒不能言於上。嗚呼。豈非所謂命耶。

稿李兩孝廉傳

孝廉李氏。名天植。字因仲。平湖人。居乍浦海上蜑園。崇禎癸酉舉於鄉。三上公車。癸未。其子諸生觀卒。自以有隱。慙痛自刻責。遂絕意于仕進。會國難。乃改名確。字潛夫。喪亂後。尚餘田四十餘畝。宅一區。乃并家具。分與所後子震及女。而與妻別。入陳山。自是足不入城市。訓童子。自給。居七八載。陳山寺僧開堂。聚聽者衆。避喧反蜑園。復與妻居。賣文以生。不足。則與妻為椶櫚竹筭佐之。又十載。益困。不能保其園。復以妻委之壻家。而寄食於僧舍。友戚憐之。相與贖蜑園歸之。于是復與妻居。時年已七十矣。所後子亦稟訓。棄諸生謀食四方。老夫婦白頭相對。時時絕食。有餽者。非有故不受。又十載。蜑園僅存二楹。雙耳失聰。又病下墜。終日仰臥。客至以粉版書相問答。魏冰叔自西江來。造其廬。先生與之粉版。冰叔書竟。先生視姓字。則強起。張目視之。泣。老淚滋滋下。冰叔亦泣。時方絕糧。冰叔探囊得銀半兩。為買米炊飯共食。作書與嘉

興布衣周青士。屬其集。知交為先生月給。冰叔過吳門。見侯齋。侯齋者崇禎壬午舉人徐枋。亦不入城市者。見書。謂冰叔曰。君意良厚。但李君不受人餽。君力量不能聽其餓死可也。及青士輩往餽。果堅拒不受。未幾卒。乍浦有鄭嬰垣者。孤子絕世。與先生為石交。先二年凍死雪中。至是先生餓死。臨歿云。我無愧于老友矣。時康熙十一年。年八十有二。葬牛橋。所著蜚園集。所後子歿。乏嗣。遺棄不可得矣。惟續修乍浦九山志。迄今猶有珍之者。

孝廉巢氏名鳴盛。字端明。號崢峒。嘉興人。五歲而孤。事母至孝。稍長。母或語父行。述父言。輒嗚咽幾絕。出入交遊。一咨于母。既婚。尺帛一錢不入私室。思有以顯揚及祿養。發憤力學。崇禎丙子舉於鄉。甲申明亡。母亦歿。即築室于墓。顏其堂曰永思草堂。聞曰止聞。而自號止園。跣步不離墓次。康熙十九年。年七十而歿。蓋三十七年如一日也。長洲徐枋侯齋。桐鄉張履祥考夫。海鹽陳洵子木。聞訃會哭。私謚曰正孝先生。自晦迹後。不為危言奇行。以動眾。詩亦不多。歿後檢其篋。有甲申歲哭君親師友四詩。以業師吳魚在。執友高元倩。皆于是年卒也。又癸丑三月十九日一詩。結語。紫桂有餘香。埋沙認遺鏤。引領望西山。草莽永如結。足以見其志矣。甯都魏禧冰叔嘗訪先生於永思堂。信宿別去。他日述先生言。為書致先生曰。所云錯認時移。以趨時

為務者。此人本心且不識安閒時務。固不足道。獨有志俊傑而無澹泊甯靜之學。雖出處得正。而嗜欲名譽。足擾其心。則器不遠大。將來措置設施。必有坐受其病。而不自知者。此語鍼砭最切。禧終身佩之。至於論文云。意有所會。油然吐之。雖大文煥發。具有夷然不屑之態。致為精論。禧向匿影山中。頗有此意。及出而交遊。未免應酬。應酬之際。又欲其工。不覺遂以文人自處。大教所謂較論工拙。沾沾自喜。有好奇之心。有求於當世之意。皆實實有之。譬之先生如秦越人。見垣一方。五臟六腑。傷滯無不畢見。禧何能更措一語。但當繼此鞭策。以無負我友之相成耳。觀此則先生持身之宏遠。自晦之貞固。友道之直諫。而於行文之法。均可得其槩矣。子二勉勸。勉子庭垣。與余善。古誼有祖風。

贊曰。靜志居詩話。稱孝廉裏足不入城府者。吳中有徐侯齋。吾郡則李潛夫。巢端明。顧侯齋。善書。工六法。名尤重。至今無遠近。寶其遺墨。李巢兩先生匿跡。惟恐不深。今里中士子。亦不能舉其姓氏。惜哉。

翁氏兩孝子傳

孝子翁運槐。字楫山。第運標。字夢野。浙之餘姚人也。二子當孩抱時。父大環以妻兄。鄔令恭城時債累。有粵西之行。次永州之新塘。夜起登岸。遂失所在。益康熙三十一年。

年十一月五日也。同舟者即恭城子。索之不得。還報狀。妻鄔聞之。提二子哭禱於神。有意外得生還之兆。日抱幼子啼於庭曰。兒他日能尋爾父歸來乎。領之乃喜。越三載。鄔歿。兄弟失依賴。兩姊以活。成童並自勵。而母命尋親。兄與弟未嘗一日忘也。運標嘗訪其伯姊。猶記舟次新塘一詩。末云。霜濃古寺鐘開處。一點空明透佛鎚。大環性靜穆。常作出世語。因以詩意合之。益信其了悟入山矣。於是兄弟往尋不得。鄉人有估於楚者。挾之還。雍正元年。運標成進士。歸時。運槐舉一子。運標曰。兄幸舉子。尋親不必待矣。復卜於神。仍得前兆。兄弟喜甚。曰。神豈終誑哉。乃就密室。捆擔肩之盤。旋為遠行計。誓不得父。則不返。人不知也。三年春。運標亦舉子。甫三日。兄弟託其妻子於兩姊。遂行。徒步負擔。測字餬口。或至乞。凡名山梵刹。崎嶇偏訪。每至即刺臂血書疏告於神。入楚。兄弟分尋。一涉洞庭。一入衡山。半載會於粵西之湘山寺。相對泣。復商所往。適其友同里邵宏傑客永州。聞之。往訪。皆驚黑骨立。哀之。因告曰。事不求其原。而僕僕道途。即斃命何益。觀兩君念誦之詩。先生益絕筆於新塘也。蓋置一舟。溯洄衡永間。天憐兩君。未必無默啟者。舟成。榜曰餘姚翁某兄弟尋父之船。楚人羣憐之。祁陽烏窩民有鄭海還者。聞之。扶杖出江干。候二子。指曰。孝子。爾欲生逢爾父。我不敢知。非然。斯洲有瘞者。爾父也。二子驚泣。請故。海還曰。康熙三十一年十一月。

七日我弟海生產男走告其外家渡江溺而格於敗葦起視葦中則赫然一人僵矣第念同患幸免出之岸留其佩物擇良瘞之後二載有恭城令喪舫泊江干揭其貌詳其姓氏里居與相失之月日以訪比聞奔告已去今海生死其妻尚存其子之生辰可稽距二日者泊於五浮於七也又孝子所云與昔喪舫揭者同則瘞洲者非爾父而誰二子泣曰似矣何以徵信海還乃問諸鄭子之母出小鑰示之曰此亦瘞者佩物也其製摺疊而缺一齒運槐遺急足往餘姚証之伯姊伯姊持之哭曰是也曩歸遺篋無鑰也以他物啟之乃得紀行詩知絕筆於新塘也出遺篋鎖啟之牝牡合哭授急足還報於是二子繞阜擗踊哀號慟哭幾絕觀者無不哭宏傑聞之亦至二子欲開視遷葬宏傑不可曰三十餘年之久又無棺也且洲廣厚而沙白地吉樹石表之可耳於是二子識之乃歸兆言得生還者以海生海還也洲初小狹自瘞大環機沙日長數年外亘以隄矣土人名之曰白沙洲洲距祁陽二十里隔岸為獅山運標以保舉出今官河南桐柏縣中丞雅爾圖勝之曰純孝足風

張庚曰乾隆六年秋八月晤邵子纂梁宏傑於睢州為余語孝子事甚悉并示送翁氏兄弟尋親序及白沙洲考嗚呼純孝若翁氏兄弟我無能贊一辭矣因節邵子之序與考而為傳以誌余之嚮往云至關忠壯神兆之奇驗則大孝之格也

書焦存兒事

焦存兒者。明萬曆中京師瞽女也。幼失父母。無所依。乞食於明智坊。羣乞欲犯之。則以頭搶地號哭曰。薄命之身。即無媒妁。甯肯為淫婦作罵名乎。管草廠宦官魯朝者。聞之。為配一瞽兒。習拍板。唱挂真兒。夫婦跪歌乞食。時存兒年十九。踰年瞽兒死。魯瘞之。又聞其獨乞。將再耦。存兒痛哭曰。苦命人不即死。嫁一夫。經年而亡。是我不當有夫也。且吾學夫之歌。以乞食。食多於為女時。忍以其歌共他人食乎。誓不再嫁。魯給之門房。與一跛媼共朝夕。存兒跪乞如故。後魯已祠康陵。甯陵呂司寇坤以霜節行役。館於魯。魯為談及。紀其事而贊之曰。存兒一脆弱女。少而孤。能全其身。嫁而孀。能堅其節。我心師之矣。

論曰。婦女節操。良由天性。然士人家猶勉勵名節。存兒何勵乎。史傳列女。多世族齊民罕矣。安有及乞兒者。嗚呼。若存兒誠足風也。為節呂所紀而傳之。以俟後之良史云。

邈雲詩集序

王垣

詩者天地之元聲。而見情之物也。琅琅乎其有辭矣。而非無故也。發於情之不得已也。琅琅乎其有辭矣。而非矯強也。脫於聲之不自主也。既無情矣。何聲之有。既為無情之聲矣。何元之有。況無情則無人。無情則無我。無情則無天地。無化育。無日月星。辰煙雲雨雪。草木金石。蛟龍魚鱉之變狀。無情則無寒暑之推遷。無陰陽之倚伏。無鬼神之騰越。與夫山精木客。水妖土怪。種種之幻異。而譎詭倏起而倏滅。嗚呼。一無情而至此極。則所謂喜怒哀懼悲歡離合。存亡去住。泡影之不足喻。而石火之未足言矣。又焉用詩。故詩者見情之物也。然則天下之為詩者。皆有情乎。無情則無詩。天下之有情者。皆詩人乎。有情而無情。則又無詩。故夫曳杖行吟。拈鬚索句。騎疲馬於郊圻。挂詩瓢於江樹。情同辭同。而顧又不同。君子誦其詩。知其人焉。蓋所感有邪正也。所發有真偽也。忽焉而操筆。曰我將為詩。忽焉而滿紙。曰吾詩已成。及就而讀之。或醇如飲醪。或淡如嚼蠟。則又幾幾乎求其故而不得矣。夫心動而情不能止。情歧而言不能齊。而淫蕩堅澁邪波詭異之說。時時間作。均足以感人者。其情真也。不足以感人者。非無情也。偽也。夫是以根我心。寫我情。出我口。成我謠。若吹之為籥。不知何以響。若雲之觸石。不知何以生。若風雨之驟至。而不知何以來。何以去也。自天地

萬物鬼神情狀悉聚腕下而供吟思。速不加巧。遲不加拙。情溢乎辭而朏朏辭暢乎情而麤麤。而非無故也。非矯強也。故曰。天地之元聲也。吾友楊君子安。於學無所不窺。弱冠以詩鳴。浮慕自多。真知則少。嘗試舉而揚之。情高於九天。抑而按之。情入於九淵。細而繹之。情周於楮墨之中。朗而吟之。情溢於筆舌之外。琅琅乎聆子安之音也。藹藹乎若覩子安之貌也。而懇懇乎則真見子安之心也。中則朴。貌則華。志則潔。神則沛。腸則熱。齒則冷。鵬若木四照之花。搏鯤鵬萬里之翼。而其慘澹經營。纏綿悱惻。殆所謂發於情之不得已。而脫於聲之不自主乎。元聲其在此矣。今之作者。無端而怒罵。無端而嬉笑。乍近乍遠。忽離忽合。而情不定者。偽也。觀者病之。讀子安詩。始如遊桂林。目不暇瞬。次之如入芝蘭之室。久而俱化。其移人之情何如也。吾是以一日三復。猶不能已。是為序。

陸梅谷夢影詞叙

陳朗

陸子梅谷詩人也。未嘗知其能倚聲。丁亥夏。偕顧子竹莊訪余于棘廬。時方索處久。蕪聲韻之學。感故人之通至。相與上下其議論者竟日。最後偶及宋人長短句。梅谷專主情致為本色當行。余則以清空為宗。而蔽以一言曰雅。梅谷領余言而去。意若有不釋然者。居無何。梅谷書至。重理前說。以為小有不合。且以所作夢影詞一卷質余。余讀其詞。大抵取材於花間草堂。而出之以新纖麗。縣密不在小宴秦郎之下。低吟往復。如所欲言。為歎服者久之。又為竊怪者久之。抑何嚮者所持論者之各異也。既而思之。則余前說猶未盡故。今夫鄭衛之聲淫聲也。其辭淫辭也。然而詩成而不削者。無俚辭故也。無俚辭。則其辭淫。而其文雅矣。詞之妙。生香真色。在離即之間。譬如驕馬銜轡而欲行。絮女窺簾而未出。又如鮮霞點水。奇花初胎。雖昵狎溫柔。至于魂銷意盡。而其思豔以哀。其言亦麗以則。猥褻之過。流于鄙俚。第琵琶還與味盡矣。若夫造品賦才。柳賦蘇豪。白石之清勁。玉田之深婉。人有不同。同歸于雅。此亦如論詩然。王孟韓白。各極其致。已爾。梅谷夫何疑是集也。梅谷問叙于余。行將付梓。知音之士。必有極賞之者。無俟以余言重也。因第理余與梅谷譚藝之旨。書而歸之。

孝節夏孺人傳

金姓

孺人姓葉氏錢塘北鄉處士琦女年三十歸郡庠生夏璜璜故具慶有兩兄皆未昏蚤世家徒四壁筆耕不足以養孺人恆鬻荆布兼絡緯以佐之甫三年璜以攻苦嘔血卒誓將身殉念奉養無人且幸有姪乃飲泣如禮不數月遺腹生子請於翁命名曰永成而姑范旋歿翁益衰三世慈獨相依上供甘旨下資饘粥胥孺人十指是賴又七年翁歿孺人經營殯殮一如喪姑時且以永成之幼也唯過時不葬是懼適益勤劬節縮得金若干購地於南山之滿覺街而葬其翁姑與夫方將以終先世之事而冀厥子之有成也不幸永成甫冠又遭疾卒於是孺人仰天椎心曰未亡人不即從夫子地下者為延夏氏一脈耳今復奚以生為乃附永成於新阡即自營殮身之具并留穿墻之資纖細畢備遂泣告先靈閤戶自經以死時乾隆四十六年五月十日也嗟乎古今婦如節烈多矣其義憤所激往往奮不他顧全一身之節斯已矣或致白頭黃口不免失所者有之若孺人遭顛困肩艱鉅仰事俯育不遺餘力閱時二紀茹苦一心卒能送往事居竭情盡慎莫安窀穸兩世同歸終子職全婦道無遺憾矣逮至天乎何酷并奪單雛履傾非柔木所支縋絕豈斷綆可引然後含悲入地齎志從夫猶且絞衾悉自親裁灰釘不煩他索以視倉皇號慟遽自引決其難易為何

如耶。夫以孱弱一婦人。生非閭閻。未習詩書。動合經權。慮周終始。非其秉志貞純。立志堅定。又焉能歷久不渝。從容就死。若此乎。顧從來操絕行。抱苦節者。天必報之。或及身而邀旌典。或至子若孫而獲顯揚。孺人既格於年例。不得請諸朝。天又奪其遺孤。使無萬有一伸之路。且門祚衰薄。欲求可為繼嗣者。僅得同輩幼弱一二人。將須其長而有子。而後可為之嗣。是并在可知不可知之數矣。豈不重可哀哉。予慮其遂泯沒無聞也。爰泚筆而為之傳。用為致孝勵節者勸焉。

舊史氏曰。余與璜之父我田。霑同硯席。篤行誠信人也。嘗遺其長子璿。從學於余。後彼此蹤跡間闊。歲辛酉。一遇我田於京師。時晉遊歸。落魄不偶。越二十有五年。余奉使請假。再聚於里門。知其三子繼述。獨抱孤孫。衰顏頹髯。對之悽惋。欲厚為周恤。而不能也。比林居訪之。則我田已久沒。其後人罕有知者。今其甥吳上舍傳述孺人事。略來告。乃知其門祚顛危。一至於此。余既深悲孺人之志。而益為夏氏傷也。抑余聞我田尊甫葬其先人。誤信地師言。置諸峻嶺。不數年。全盛之業。悉付水火。再傳遂子姓凋殘。存者亦皆孤弱。享祀不克。時舉嗚呼。是果天實為之歟。

永康縣學宮建修碑記

寶光鼎

永康縣學自明正統己巳燬于寇邑士應仕廉捐貲重建至宏治庚申大成殿災仕廉孫尚端拓基重建尚端子天成繼成之而明倫堂則自成化間仕廉孫尚道重葺至正德癸酉尚端子天澤等復修崇之嗣是後裔分掌一牆之圯一木之蠹不以煩有司子孫繩繩視若世業焉嘗立學宮會備歲修之費我

皇上御極三十有二年尚端裔孫秉璋以文廟建置歲久銳意大修功宏費鉅會貲殫盡復議捐貲立會族人踴躍爭先重貲備用比年歲修有贏無絀予按試經由學側教諭方卓然具道其事請為之記而予未暇也後三年予復使浙又三年試竣麗水學教諭應正祿錄其志乘碑記可稽者以呈予予惟古者設學以明人倫中庸所謂天下之達道也聖人修道為教而惟夫子集其成故殿曰大成堂曰明倫所以正教也道之不明教術分歧佛剎道觀無慮貴賤不惜厚施營構以資禱祀而郡邑學宮之繕修率由有司督糾衆力然後成事其故何也蓋生人理義之心與欲利之心同稟生初顧理義微而難見而利之為欲易溺異端詭說導以所欲浸淫肺腑貪生幸福之私雖賢智不免而使之適於理義非強勉不能服從習漸然也應氏之族獨能力建文廟祖作孫述傳數百年承修不急可謂知所擇矣抑思夫子勗子

夏。為儒有君子小人之分。不可不察也。君子務躬行。不尚口說。子臣弟友。夫子猶云。未能治己治人。皆是道也。真儒不世出。而訓詁之傳。多逞臆說。甚至侈言性與天道。區儒林與道學而二之。則已好名而失其實矣。後之人復拾其唾餘。為時文應試。父兄以之為教。子弟以之為學。率以小人之心。而欲假君子之辭。近且并其辭亦失之。而傳播習襲。陷溺本心。嗜利之為。或反出二氏下。可哀也已。今講章邪說。放黜既嚴。亟正所趨。而志於君子之學。窮經述史。反求諸己。由獨知之不欺。深造以致其道。是予所願與諸生共勉者。非直為一邑一家言也。是為記。

關帝廟碑

乾隆三十九年秋八月。山東壽張縣亂。民王倫聚眾殺邑令。九月。陷堂邑。陽穀。遂觀東昌。巡撫徐公麟率官軍往捕。遇諸柳林。時諸路調兵未集。官軍不滿五百人。賊眾數千。蜂擁圍官軍。官軍力戰。殺傷過當。然餘騎已不滿百人。於是大風。飛起。揚沙。震日。賊眾賊亂。公率騎突圍出。左右僉言見關帝道右。賊故不敢逼。後訊所獲賊醜。亦言攻東昌時。望見帝立城上。眾惶怖解去。蓋是時賊已氣奪也。已而官軍大集。大學士舒公赫德奉命來督師。賊遂平。四十一年春二月。

上以金川平定。告功關里。時公既調撫河南。赴行在迎覲。

上詢柳林勦賊事。公具以狀對。特命立廟崇祀以昭靈庇。御書神威垂佑四字。俾勝諸廟。公還乃卜地於開封府城之西。越明年廟成以書來京師。請書其事於石。光祿惟自古以功德忠義祀於後世者。各廟於其地。惟關帝廟遍布天下。自春秋秩祀外。雖里巷婦孺莫不奔走禮懺。無間時日。而帝之降靈昭顯。赴機應會。捷逾響報。方賊之窺東昌。拒官軍。柳林若炬火驟熱。且燎原。帝庸赫怒。鼓舞風雲。助我驅除。卒仗神威。哀之臨清。剋期殲絕。肆靖東土。崇祀報功於義惡容已。或曰。禮祭法諸侯在其地則祭之。不在其地則不祭。帝之神佑見於柳林東昌。而廟於開封。亦有說歟。光祿曰。帝之神行乎天下。天下之人隨地為廟。以致禋祀海陬山裔。獲萌慕思。洋洋屬屬。如奉考妣。蓋不獨山東河南為然。而柳林東昌偶以像顯示眾觀瞻。用警動愚蒙。令知順逆禍福。大易言神之不測。中庸言誠之不可掩。此可徵也。蘇文忠公撰潮州韓文公廟碑。謂公之神在天下。如水之在地中。無往不在。而以潮之廟比之。鑿井得泉。夫一井之水利及一方之人。至水之行乎地中。天下咸取資焉。帝之神佑見於柳林東昌者。譬則一井之水也。而隱然遍於天下人心者。譬則地中之水也。且吾聞之神依人而行。徐公在山東。於柳林若或見之。今移撫河南。即於所治廟享之。半夜繹思之。將祇奉明威。濯濯心慮。以率化羣屬。俾大河南北近遠守土之吏。翼翼懷懍厲。

意民事。儼若帝之臨於其上。監於其左右。無敢為貪噬暴攬。滑漁情靈。橫政盡滌。橫民自息。協氣所蒸。風雨時節。年穀稔成。疾厲不作。其惠佑所及。不益遠乎。於是次列其顛末。而繫以詩。用示不忘。其辭曰。

帝昔扶義漢鼎匡。歸駟赤螭九蒼。享佑我。清神武揚。經日出入。彗星狼矧。茲近甸。齊魯疆。草竊公然。倖拒螳。帝赫示現。開額蒙。摩天乃運。先以風助。順禍逆理。可憑。兇豫錯壤。謀肘通。安靈攝宇。我新宮。北俯河濟。南揖嵩。御書高榜。飛蛟龍。績也承命。釐厥功。几筵對越。敢不懷。要敷威德。均吏。眈眈如嘉禾。無莠稂。吏畏不為。蟲與螟。原豐黍稌。隰稻秔。戶介眉壽。有酒醴。歲時告虔。蠲吉良。寶其薰。蠶穡牛羊。有孚盟薦。升馨香。永千萬祀。善降祥。

永濟縣知縣王君墓誌銘

原任南汝光道張君冲之。為其同年友。永濟縣知縣王君請銘。且曰。是嘗辦河灘地。與藩司抗議。不以重租累其民者。鼎聞之。慨然曰。州縣吏重失上官意。若邱山。王君有是可銘也。君諱大呂。字諧六。先世山東海豐人。其曾祖諱為輔。仕湖南常德指揮。子孫留家於澧。遂為澧州人。君幼慧。入庠有聲。雍正六年。特詔地方官。各舉賢良方正一人。君以知縣用。發河南。歷署考城伊陽。丁母憂。服除。授新蔡。居七歲。獄為空。

者二歲蝗不入境課最矣已而以鹽政奏君銷引不及額離任後三年復授山西之河津居三歲以能調永濟時永濟與陝西之朝邑訟爭黃河灘地久不決君按故糧冊勘計議與朝邑四六分隸會大學士公傳公金川凱旋

上命即途次與大吏會勘如議訟爭遂息而藩司議依河南河灘地起租君以灘地確不任重租力請不允則逕詳巡撫藩司忿曰是以我為名將劾君君數曰吾豈以一官遺民害耶乃復條列不便十事力請於巡撫阿公會藩司以事調改阿公卒用君議定租永濟民自是安業君所至得民新蔡永濟皆為立生祠然卒以縣令引病歸君歸十八年以病卒實乾隆三十五年七月初九日也春秋七十有八以年月日葬潞河原所著有水經注略十二卷祖諱國鉉父諱世訓庠生皆以元年贈如君官祖妣陳氏妣劉氏皆贈孺人君三兄一弟長大業康熙乙卯舉人知秀水縣君初娶劉氏繼娶樊氏皆封孺人有子四長孫曾選拔貢生樊孺人出也次孫筠次孫繹次孫祖女子五皆適士族孫二瓊琨女孫一君之卒孫曾應京兆試聞訃泣告於張君張君與予友善其居官子子不阿所許與宜不妄銘曰

德其有遇其偶諒其守施其隅叶銘我訃叶信其友

河南南汝光道張君墓誌銘

張君諱冲之字道淵一字述圖其先世由唐相曲江公來嶺南節度使九皋至宋南軒公棧多有閑後遷宜興明洪武中又自遼東入京師遂為宛平人高祖諱邦經用兄禮部侍郎贈尚書文愷公諱邦紀歷仕至太僕寺少卿以救楊左諸公罷職曾祖諱永貞明天啟丁卯舉人贈東克道參政祖諱宏儼順治辛卯舉人以君貴馳贈奉政大夫父諱銓博羅縣知縣累贈中憲大夫妣王氏累贈恭人君才敏立事而棘棘不苟隨雍正六年特詔舉賢良方正君由諸生中舉者得分工部學習逾年授虞衡司主事後四年以議事被劾謫潞河今

上御極之二年蒙恩以原官補用十三年補刑部督捕司主事又二年遷江西司員外郎兼辦奉天司事又四年遷戶部河南司郎中初君在工部遇事奮厲銳意爬剔於總理果親王前持議無避忌人多憚之然君嘗言各省奏追虧空官帑積數千萬贖冗無實為王具奏稿請核別豁免人不知也及再歷郎署皆稱平恕其在刑部遇恩詔議奉天遣人悔過分別放歸阿文勤公用君議得歸者數百戶秋讞滿洲關毆殺皆情實案犯在奉旨前者十餘人君白文勤公入奏仍緩決其在戶部河南奏追虧空以人亡產絕為無力產絕人存為有力君以有力無力惟視產之有無議駁遂為例二十六年特授河南南汝光道是年秋河決楊橋

上命劉文正公姚文襄公往塞之。君以舊屬襄事。時徵彙結價騰至一莖兩錢。既大集。河員猶以多備請。地方吏在事者附響和聲。多口一詞。君慨然曰。計工需料若干。萬今已贏矣。災民挖脂髓來供用。忍復乘以為利耶。亟白二公。請及時捷塞。期以某日合龍。仍當餘料若干萬。二公與巡撫胡恪靖公嚴議。君復力持之。卒絀衆議。聽君減徵秫稻六千萬。麻六百萬。即以君董其事。果如期合龍。仍餘料若干萬。君復請彈數給還。以紓民力。胡恪靖公喜曰。吾為國家得一良總河矣。劉文正公還。向南書房同直。諸公亟稱之。逾年。胡公卒。又二年。竟以所屬商城縣獄坐。徇庇奪職。効力軍臺。逾年。始克歸。君之在南汝光也。治所屬羅山縣獄。活誣服者四人。紳士捐修城工。核減務實。有司不得緣為蠹。人至今德之。君娶柴氏。封恭人。先君一歲卒。子三。模。乾隆壬申進士。今候補郎中。桓。四川重慶府通判。先君四月卒。榮尚幼。模。桓皆柴恭人出。女二。其一早卒。孫七。光熙庚寅舉人。光烈拔貢生。中正。光然。中達。皆諸生。光熊。光煦。女孫八。四已適士人。曾孫一。喬齡。曾孫女三。予初為翰林時。君方待缺居間。予同年朱東江授兩郎。君舉子業。常邀予與。君賦詩為歡。及君起再躋。長君由翰林歷郎官。督學廣東。以事降調。次君亦由川假歸。而東江已棄世。惟予以衰病時相遇。從然亦不復論詩矣。次君之卒。君亦病。謂予曰。我死幸為銘。未幾君卒。實乾隆丁酉十月壬

寅年七十有七十二月庚申長君模以君合葬於蕭家村之新阡來告予哭而銘焉
銘曰

遯車駟驪稅於方輻既牽以馳夷行復殿馳或推之殿或摧之所值則然誰使為之
有蔚於繼善既貽之筮宅兆吉我銘俟之

郇城先生墓誌銘

朱稽孫

郇城先生奇才也。負其奇，無人知其奇。其奇究未得稍用於世，而竟鬱鬱以死矣。先生諱繩甲，字烝哉，郇城其號也。姓徐氏，烏程人。曾祖曾詒，諸生，贈中憲大夫。祖汝嶧，康熙壬戌進士，按察司僉事。督河南學政，父遵玉，歲貢生，候補同知。妣王氏，先生年十五，補博士第子員。康熙庚子，舉於鄉。歷河南山東知縣，後改補諸暨，教諭以終。先生少穎敏，書無所不覽，下筆千言。時文規撫嘉魚，詩則浸淫於浣花叟，而稍稍參以王介甫古文，胎息韓蘇。晚年出入於宋元諸名家，謂足以追數千載之上，而與之頡頏。然稿成輒為人取去，不甚愛惜，亦無復記憶。雖間有存者，從未嘗排纂成帙云。蓋先生以詞章之學為無用，即工固不足道也。生平焚膏繼晷，勤求無已者，恆在經濟之書。凡禮樂兵農選舉學校刑書布域，一一致詳，而尤繫心於水利。其言曰：先王之世，無曠土，無游民。今朝野之均，憂不足，而小民之艱於謀食者，蓋以上之曠而游民多也。誠使大墾荒土，間田修明水利，倣古溝洫之制，蓄洩以時，旱潦有備，則石田皆膏腴也。千倉萬箱，何求不獲。省東南百萬之膏，儲國家無窮之利，而蚩蚩者氓咸盡力於南畝，衣食充盈，含哺鼓腹，羣忘帝力於何有。豈不休哉！乃時復向人言之，而人咸莫之省也。惟座主穆堂李公奇之，深以為然。然亦何益哉！先生志不得施，為令時

有可著者二端。固始界連蕪黃。崔待充斥。李貴者盜魁也。集無賴惡少年。以標掠為事。大吏飭捕之。先生夜二鼓。一童子張鐵步行入其室。食客愕然起。先生曰。吾縣官也。若李貴乎。有言諭汝。隨取文書示之。貴叩頭求恕。先生曰。吾貴汝罪。授汝為捕頭。汝能使邑中無盜乎。貴曰。能。先生隨至會城。陳其說。大府允之曰。此古人以盜治盜意也。從此迄先生之去。夜戶不閉。道不拾遺。民用安堵。其令惠民也。值歲旱。以工代賑。將事皆民夫。所修武定府城費八萬四千兩。有奇。監督城工鹽運使李公欲使京夫攬之。先生屢與之力爭。相持不決。李出民交口懇曰。

皇帝宣亟亟修城哉。良以歲大穰。散賑之餘。我民仍無飯喫。故沛此恩膏。俾其活命耳。如用京夫。仍將餓死矣。擁輿不得前。李訴之中丞。調陽信以去。旋以調簡引見。改補教職。作教十年。課士有方。然詞章之學。可與談者寥寥。況其他乎。所謂可著者。僅如此。先生生康熙壬申。卒乾隆乙亥。享年六十四。妻周孺人。繼錢孺人。予姑之夫。桐鄉。又持錢公女也。子四。長之觀。為叔兄後。次之濟。早卒。妻沈。未婚歸徐守志。次斐。然諸生妻朱。蓋子女也。次爾驥。尚幼。丁丑初冬。斐然卜葬先生於烏程縣之盧家浜。以兩孺人暨遙張附焉。來乞銘。銘曰。

維天生才。桐花之鳳。惠我烝民。廟堂梁棟。小試鳴琴。簿書一闕。孤負此奇。天真夢夢。

金陀薈萃序

鄭虎文

嗚呼。吾今而知文章之事。天必有所大不忍於人者。而後生聖人以作之。復生聖人以述之。千萬世遂以有其事而不可廢。何以明其然乎。吾茲讀金陀薈萃一書而知之矣。金陀薈萃者。金陵岳君水軒。因其先世宋鄴侯名珂者。所輯金陀粹編。增訂而成之。而金陀粹編。則鄴侯為其祖忠武王。辨誣而作者也。昔忠武為檜賊所搆。陷死獄中。孝宗白其誣。追復爵土。贈卹有加。至今忠武之心。所謂如青天白日。奴隸皆知其清明者矣。顧當檜誣而殺之之時也。御札則收之矣。功狀則削之矣。熊克王伯庠之輩。則曲筆而紀錄之矣。使鄴侯不積數十年卧薪嘗膽之苦心。捃摭掇拾。徵信考疑。條列而上之於朝。則宋史檜黨之筆。傳於後世。後世必以為史冊所載。未盡事實。則建儲一奏之疑。於邀名。淮西逗遛之疑。於怨望。棄山陽而保江之疑。於失計。人誠不能不高忠武之功。誠不能不哀忠武之枉。而終不能不警忠武之心。夫殺其身。滅其家。而白其心。忠武之所甘也。王其號。榮其嗣。而沒其心。忠武之所痛也。且非獨忠武之所痛也。古今來忠臣義士。往往仰天椎心。至於斬頭陷胸。而不能自明者。又豈少哉。此鄴侯所以抱區區之心。而不能自己者也。顧吾聞之。唐張巡許遠之守睢陽也。城陷身死矣。其時猶有疑遠辭服於賊者。昌黎以為兩家子弟才智下。不能通知

前人事因書巡傳後以最其迹而後其論乃定使鄴侯亦如巡遠家子弟識不足於考據才不足於記載苟為陳請漏略蕪雜無足取重必不能宣付史館據為典要而又無昌黎其人者一言以證明之則鄴侯亦徒抱此區區不能自己於其祖之心而卒莫之有濟也然則忠武之忠鄴侯之孝為之鄴侯之孝鄴侯之文為之而忠武之必有鄴侯鄴侯之必孝而能文則非人為之也天也使天而不必生鄴侯或生矣而不必孝即孝矣而不能文則顓天辨冤之錄必不奏忠武之心必不白而檜之罪亦不著忠武之心不白檜之罪不著則人皆樂於為檜而不樂於為忠武樂於為檜而不樂於為忠武是胥天下而入於禽獸矣天不忍人之夷於禽獸也故畀之以文章文章者所以拯人於禽獸之具也推而論之孔子之修春秋鄴侯之撰粹編皆是物也故作述之事重焉顓鄴侯作之曰粹編水軒述之曰薈萃而仍繫之金陀者何歟粹編志辨誣也薈萃志增輯也易其名者懼亂舊也易名而仍繫之金陀不忘祖也孝也吾觀晉南渡衣冠之盛首數諸王推其先皆祥覽後則孝弟之流澤長矣蓋忠以其義烈之名名萬古孝以其仁愛之澤祥百世理固然也即如今婦孺所共指為忠臣甚且道說前事感憤激烈不啻欲代為刺刀於仇者忠武而外則蜀漢之關壯繆也顧民皆嚴事壯繆過於忠武其後鮮克有聞者若忠武之距今且六百有餘祀

矣。猶有裔孫威信公鍾琪者。起於本朝。為世名將。定青海。平金川。豐功偉略。論者謂不愧忠武。而水軒之才。余則謂其又甚似鄴侯也。嗟乎。明德之後。必有達人。人亦何憚而不為忠孝也哉。

松溪書屋圖序

新安士之健於文者。有六君子。汪君在湘其一也。君以名諸生。五應省試。不第。棄去。抱遺經誦之。旁及子史百家之學。恢博貫結。靡所不究。足不入城市。城市人亦罕與接。惟其徒五君子者。從之遊。則兩忘其趨。五君子者。鄭用牧。牧。學宗宋儒。戴東原。震學宗漢儒。皆休產也。君少同筆研。嘗合刻經義數十首。朴山方先生序而行之。所謂新安三子制藝是也。其三人。則同邑宗人稚川肇龍。以經。程易。田瑤田。以詩。方晞原。矩。以文。皆互相切劘。務為根柢之學。而六君子之名。乃大著。四方知名者。客新安。必得其接引。為重。而君尤愛聞惡。客非因五君子以通者。鮮得至其室。獨專靜純。一於學。如飲食嗜欲之不可離。絕與世之學者異。夫世之學者。工剽賊。熟揣摩。媚語言。巧趨蹌。得則奮鱗翼。乘風雲。沛然而有餘。而君故無此利心。否則弔詭驚博。高自標置。攘袂矯俗。振其華耀。可以閉戶塞竇。而煽聲譽。又不然。箋疏注說。輟輟下上。所謂黨枯竹。護朽骨。窮老盡氣。莫得而本者。嗚呼。然輒自謂可以萬世。而君則又無此名。

心夫利利也。名亦利也。太史公曰。設為名高者。安歸乎。歸於富厚也。今之學者。其能異是乎。異於是而卒不懈於學。是猶不羨魚而結網。不數獲而從禽。漁獵者必竊笑之矣。雖然。農者逢年。賈者倍息。藝者粥技。傭者計直。天下未有為其事而無其報。惟責報於學。往往有所事非所報。所報非所事者。君故絕意仕進。無望報心。所謂弗言祿祿亦弗及者也。若彼五君子。或舉於鄉。或貢太學。或猶為學官弟子。其中年最少者。獨晞原耳。然已四十餘矣。率沈沒困厄。無所遇。甚者屑屑為衣食。猶不贍。而名出其下。萬萬者。連畛而起。或且遂持衡出而稱量天下士。嗚呼。此天下所以多苟且之學也。然則得報者不必學。學者必不責報。五君子豈獨異於君哉。特未能如君決然舍去為可惜耳。然此亦遇為之。君倘同其遇。恐松溪書屋之席。亦卒卒未暇煖矣。即如僕者。少孤露。長而饑驅。既通籍。浮沈者數十載。今且老矣。猶操兔園冊子。作三家村中老學究生活。以給饘粥。雖欲從君吟弄風月於溪聲松影中。豈可得耶。然則名山不朽之業。天寶界之君矣。僕雖衰頹。幸未入地。猶願掃除暮氣。率五君子為君鼓吹。而羽翼之。君其勉旃。

沈定夫詩序

昔大禹八年在外。而作禹貢。周公居東三年。而賦東山。孔子刪訂六經。亦於轍環歸

老成之。即自漢迄今之以著述傳者。半出於勞臣遺客。足迹偏天下之人。其諸伏身鄉井。跼影閨闥者。猶之盆魚籠鳥。不足與知溟濤寥廓之高深也。村農市夫。不足與知朝廷宗廟之巨麗也。或泥古而乖今。或爲近而忘遠。即有所作。如蛩號鼠唧。萬聲一擗。聽不留耳。故當世罕聞。後世莫述。丈夫志四海。萬里猶比隣。此陳思之詩。陳思之志也。而建安七子。陳思遂爲之冠。此以知文章能事必屬之善遊人。而詩則尤資之何則。詩本性情。而性情之爲物。無形而能形。無聲而能聲。且舉萬有之形聲。以爲其形聲。彌天地而皆是。互萬古而不滅。此其象如火。然火爲日之精。散而孕於木。若石之中。未始見有火也。於是燧取諸石。鑽取諸木。搏取諸石。而火乃生。又於是縵以承之。膏以沃之。風以鼓之。而火乃熾。火之未生。有精而無形。火之既生。有形而無質。無質故無物。寓無物于物。而無物之非其物。即詩之元機真諦也。然則詩之情不可無。若燧若鑽若搏者。以引之也。不可無。若縵若膏若風者。以達之也。引之而情生。達之而辭生。情生於所引。則興之義也。辭生於所達。則賦與比之義也。賦比興三者。觸於境而寓於物。境不親歷。物不備知。則塊然者。內不足於情。其爲情也。僞。枵然者。外不足於辭。其爲辭也。鄙。不僞不鄙。則二體立。三義備。而後可以嗣響風騷。故有唐一代。言情維北。征賦物維南山。爲百世冠冕。然豈不讀萬卷書。不行萬里路者。所

能道隻字哉。吾鄉沈君定夫。於書無所不涉。通刑名法家言。而一歸本於儒術。少負經世之志。無所遇。去為諸侯賓客。今老矣。名益重。賢公卿交走幣於君之門。君善之。然亦不能辭也。用是於天下吏治民情土俗之沿變利病。頑良瘠肥。皆其所口講而指畫者也。日星河嶽鳥獸蟲魚草木之驚心駭目。殊形詭趣。紛紛綸綸。不可殫論者。皆其所網羅而捆載者也。而且荒壑殘碑。憑今弔古。登山臨水。送遠懷人。則凡孤臣孽子。勞人思婦之憂思而憤懣者。若寤寐通之。而歌泣共之者也。於是乃一發之於詩。其為詩也。蹈實而虛。耀暗而明。隱見合散。悠揚奔騰。倏閃變化。而莫主其形名。與吾所云火之說者有合焉。嗚呼。可謂善達其性情者矣。然非君之善遊。不能盡發其胸中之奇於詩如是也。詩之必資於遊也。信矣。余因讀君詩。而若有所會。爰書之以為序。

黃歙遊草序

詩何自始乎。曰始於性情。性情何自始乎。曰始於未有天地以前。夫仁義禮智信謂之性。喜怒哀樂謂之情。從乎無可名之中。強而名之以性。名之以情。且名之以仁義禮智信喜怒哀樂。而當其初。則固未嘗有也。未嘗有何以知其有。於其所必不容已於有者而知之。而名之。故名之非必其如是。而惟其不容已者為必如是。凡天下之

自無而之於有者皆然也。故未嘗有天地。以不容已於有天地。而遂已有此天地。未嘗有人。以不容已於有人。而遂已有此人。未嘗有仁有義有禮智信。有喜怒哀樂。亦以不容已於有。而遂已無不有。於是有而畜之。則為德。德而率之。則為道。道而宣之。則為言。言而歌詠之。則為詩。詩不期怨而怨。故怨而不怒。不期樂而樂。故樂而不淫。不期哀而哀。故哀而不傷。以此不怒不淫不傷之哀怒樂。措之天下。則政舉而化成。垂之萬世。則道明而教立。數之所自至。理之所自及。勢之所自趨。當其無不能為有。當其有不能為無。皆此不容已者為之也。而名人之所不容已者。則為性情。故必不容已於有。而有為真性情。亦必不容已於有。而有為真能道性情之詩。嗟乎。天下之不容已者。不可得而已也。天下之不容已者。不可得而已也。已其所不容已。而不已其所不容不已。則其害遂有不可勝言者。其在天地。則有薄蝕陵關。震崩沸竭。與夫愆伏氣稷之患。其在人。則有奸貪暴悖。劫殺死亡。兵革之禍。中於人心。而形之謳吟詠歎。則佞而諛。偽而辯。文而侈。分離乖隔。生心害政。是之謂淫辭。夫治世之音安以樂。亂世之音怨以怒。亡國之音哀以思。詩者音之通於樂者也。故其盛衰常與世運相準。故聖人欲驗性情之邪正。則采之以獻於朝。欲一性情之皆出於正。則刪之以式於後。正性情以正詩。治之於其本也。正詩以正性情。治之於其末也。治之之

道微乎其微。孟軻氏所謂故而已矣。故者以利為本。故曰不容已者。詩之所自始也。非是者無詩。何則。彼之所謂性情。非吾之所謂性情也。金陵岳君水軒為忠武二十二世孫。文章經濟。負天下重望。年已七十矣。未嘗一日用於世。而卒未嘗一日不用於世。不以其不用也。而有所戚。亦不以其未嘗不用也。而有所矜。蓋其性情。有不容已於天下之故。因有不容已於天下之事。亦遂有不容已於天下之遊。故遊不必黃鵠。而亦不必不黃鵠。詩不必黃鵠。遊而亦不必不黃鵠。遊。稱心而言。愜心而止。不知有今人也。有今人則今人而已矣。并不知有古人也。有古人則古人而已矣。然亦不必不今而古之也。惟古於詞。必已出。則昌黎乎。行乎其所得。不往止乎其所不得。不止則東坡乎。蓋自有其所不容已於性情者。而鬱結焉。而磅礴焉。而曼衍焉。而浸淫焉。如火之炎炎。然水之混混。然雲之油油。然風之蓬蓬。然根於生。天生地。遞相生。而忽得之於詩者。所謂不容已也。惟其不容已。故不可廢。惟其不可廢。故必可傳。凡古詩之傳者如是。而君之詩已如是。則余說君之詩亦止於如是。而黃鵠遊草其一斑也。若夫偉略崇情。式孚物聽。功在國而不有。民戴德而不尸。其赫赫照人耳目者。當世名公卿。皆數言之矣。余因而重之。是所謂可已而不可已者也。是又茲集之罪人也。故不復贅。

書潛山尋墓記後

余少讀柳州襄陽丞趙君墓誌。至其銘曰。百越蒼蒼。羈鬼相望。有子而孝。獨歸故鄉。不覺捧卷流涕。默念天下。凡為子不幸而親此者。宜無不爾也。長而縱觀羣書。如趙丞兒者。亦往往而有。顧竊怪目未得見。見則類多生去其父。而悍不一顧者。死父則又何望。久之聞有翁孝子事。孝子名運標。餘姚人。父客楚不歸。孝子幼。罔識所在。長而孑然。走數千里。得遺骸於湖南之道州。以歸。已而以甲科起家。知道州事。民感其孝。刑措不用。余視學其地。猶聞士人口不忘翁孝子也。又久之。余客新安。且五載。得讀方君淮潛山尋墓記。記贈公如珽尋其曾大父。匱於潛山之黃石坡。得之石洞而作也。贈公大父。先曾大父歿。父歸娶。而曾大父卒於潛山。會明亡。兵亂道梗。贈公幼孤。泊長諸長老皆歿。無知大父事者。族有老婢。為言從姑嫁長翰山程氏。年七十許。宜知訪之。猶存。云曾及見曾大父歿時狀。遂偕往。至則叩金城寺僧。僧指普同塋曰。此吾亡師。亂後斂戰骨處也。恐入此中矣。乃相向哭。復徧跡之用坂人言。求石洞。得敗棺。啟視髣髴。盡落得白金簪於髮。從姑驗之信。乃負骨歸。歸距其曾大父卒時。已五十有六年矣。余用是而歎孝之果可通於天也。夫以音容未接之孫。又當陵谷變遷之後。白骨如莽。盡歸僧塋矣。豈復尚冀有人能知之而告之者。即告之矣。或其從姑

已不及待而死。從姑即不必死。而族家之婢亦老矣。苟先從姑死。又烏知長翰山尚有十四齡曾識大父殮時綰髻一簪之從姑在也。嗚呼。豈非天哉。夫天者天下之人之本。而祖若父者一家之人之本。本無異本也。故天可得而通。通於天之為孝。而孝故凡為子者。宜無不爾也。而世且以為奇行也。悲夫。

汪霖傳

汪君名霖。字雨蒼。號榆園。歙西巖鎮人。唐越國公華四十一世孫也。生有奇稟。年十歲。應童子試。即冠其曹。長負大略。喜讀書。尤熟朱子綱目。日夕不去手。恥齷齪守章句。家故饒業。艱父歿。中落業。賤構外侮者數歲。事已喟然曰。讀書會有用。安事帖括。遂棄而自放于世。君身長不滿七尺。英毅精悍。雖強武者遇之。皆自失。常遊武林之西湖。眾無賴子弟數十百人。方刼持一新安客。勢洶洶張甚。薄視之。則故人也。君怒奮臂排眾直入。翼故人。縱橫出數十百人中。數十百人咸自盪擊顛踣。股栗匍匐。有僵不能起者。君顧視大笑。徐把臂去。又當渡錢塘江。潮怒舟沒。同行舟盡沒。君攬身入巨浪。左右騰躍提擲。盡出溺者。排岸觀者如堵。呼聲若雷。皆以君為神人也。於是人爭傳君材武。有願奉千金請授技者。君麾之去。自悔曰。以拳勇名。非夫也。終身不復言技擊。性好客。善飲。飲酣縱談前代興亡治亂賢奸義烈事。輒抵几慷慨。若不自

勝坐客皆竊竊詫歎以為狂蓋君志欲大有所用於世顧以沽畢之學為不足重而初猶力足以貲郎起家否則出其武略亦可以料第致通顯皆不樂就沒身貴人中鬱鬱無所試故亦往往而悲也君既不遇生產日薄則又盡傾其資倡族人立取先世所累棺未瘞者盡葬如禮於是洗手赤立至不給旦夕一日婦脫頭上簪易斗粟市人倍與之君曰誤也歸其贏冬夜行市中見裸臥而呻於途者即視且斂急歸持所覆衾覆之然家故無餘衾也當一出為鹹商某主計數載忽散橐中金為償諸傭之負主直者一夕立盡遂襤被返人益義君益嚴重君然而君殊不屑屑措意也晚歲縱情詩酒山水間或童冠耆舊雜坐竟日燕笑無倦容時復曳杖獨出意行無定向偶過村巷籬落聞吟誦聲輒低徊駐聽聲寂乃去葦一椽劣可容膝課其子手書為善最樂讀書使佳八字願之指謂其子曰此吾志也汝其識之年七十有二以太學生考授州司馬卒於家子湘商籍附監生孫百名乾隆癸未進士百名兄一騰辛卯副榜貢生當從余遊以狀來乞言於余余讀而悲之故為之傳云

論曰漢李廣材氣無雙而文帝曰惜乎子不遇時廣卒以數奇不侯死然而廣亦足以自見矣余觀君生平昌黎所云深山大澤龍蛇變化不測者意謂近之雖然此猶皮相耳嗚呼君真奇士哉

國朝文匯

卷十一

二十四

國學扶輪社印

翰林院編修叔山邵君墓誌銘

今海內人士所推能為東京六朝初唐之文者無論識與不識必首稱吾友叔山。叔山與同歲舉進士。名能為史漢若昌黎河東文者則有定興王君芥子。芥子初亦好為文如叔山。及見叔山文歎為天授遂輟不復作。二君同年歲同官翰林同以文學相引重而又同以原官放歸田。未幾芥子復起累遷至湖南觀察行大用而叔山則竟死矣。觀察嘗遺書索刻其文將序以觀示後學。叔山未及應卒。明年其孤培德走使乞觀察銘其藏。觀察曰序吾已生許之矣。銘請他屬。培德則又泣而請於文。文與叔山交不後觀察乃序而銘之。君姓邵氏名齊肅字荀慈叔山其號也。先世在唐貞觀間居杭之北市曰道宗無子以弟禮部侍郎說子好禮為後。凡十有三傳由杭而睦而歙至饒州都帥顏子萬成乃卜居休甯之黎陽。又二十傳至鄉飲賓若水始遷常熟。常熟後分縣為昭文遂著籍為昭文人。若水生君曾祖歲貢生庸齋贈儒林郎庸齋生君祖附貢生莊庵莊庵生君考候補主事味閒並贈奉政大夫兵部武選司員外郎味閒少孤能強毅自立遊義門何學士門受其學尤善書得二王法生五子君其第二子也。生之夕夢明祭酒馮公夢楨以名刺來謁聞若願借居三十六年云。寤而君生因名君小名曰開生三歲生母曹安人卒嫡母程太宜人撫之愛如出腹。

子甫受書。輒了大義。塾師驚辭不能師。長而愈慕。有聞於時。其學於古也。涵而探之。去故遺迹。咀含浸淫。滲漉衍溢。乃大昌於辭。而惟自其已出。今古駢散殊體。詭製道通為一。涉筆矢音。金石咳唾。造次以之。允蹈維則。班范潘陸斯文未墜。君於本朝一人而已。乾隆壬戌第進士。其闡中文騰輦下。人皆口傳以熟。後有效者。輒得弋獲。雖形貌乖舛。羣相指為邵體。君聞之。不以為忤也。君既入詞館。明年。駕幸翰林院。錫宴仿栢梁聯句。與馬尋獻。東巡頌原道數章。研神播采。揚班之亞也。羣公器之。爭欲致君門下。顧君冲澹。不肖揣合。相滄滄為曠。又習與一二靜者遊。益耽聞。喜自弛置。時多少年暴起。意氣盛。各以才力相鬪。扇輿馬服御。燕款相矜高。雖謹厚貧者。咸務此。不若不得比人數。而君族又有以貴雄者。世故誤指君為富人。顧獨乘羸車。攝敝衣冠。傲然出衆中。則大駭。久之益落落無以自見。乃自顏其齋曰道山祿隱。在翰林十年。充書局纂修者再。充京兆分校者再。兩遇廷試。亦再屈。遂罷歸。時年三十六。說者謂符昔夢云。君通籍。初遭母兄喪。旋喪偶。思親圖歸。日夜以冀。既歸。得侍融融怡怡。如其兒時。退事著述。益肆以醇。閒遇國家慶典。宴賡禹謨。鎗洋廟堂。假羽飾喙。頡頏鸞鳳。郵書屬草者。使填於門。負龍蟠螭。銘宮揭阡。人交走幣。恐後咸須。君文以休萬祀。身晦名顯。日適以崇。乙酉清蹕南巡。有詔徵在籍詞臣。某試

闕下時文官京師或謂曰此舉意在邵某也若與邵厚曷促之來文曰邵某病且母老恐不果來已而竟以疾辭不赴越四年卒春秋五十有二君貌清古豐下銳上首微窪如仰釜眉目疏秀短視精章草入晉人室每據案書望之若隱几臥者嚴冬喜脫履擁爐坐客至倉卒覓履不得隨取躡之履異旁觀竊視匿笑君覺之亦自笑已且復然終不以措意當金川之平也相國忠勇傅公旋師禮成坐朝房百官咸會君立門外面之取鏡諦視公呼入問曰若何視君微哂不答徑趨出其意度夷曠類如此與之遊者未嘗見慍色即慍未嘗出聲氣性愛才喜獎借後進嘗主毘陵龍山書院君歿士有哀之若父母者君一兄三弟齊烈乙丑進士選為庶常卒於官齊熊舉人內閣中書舍人齊然齊烈同榜進士由庶常改官兵部武選司員外郎齊鰲貢生皆賢而有文者配席安人太學生贈文林郎永恂孫附貢生鎬女有高行先卒君已葬而銘之繼配王安人資政大夫戶部侍郎原祁孫通奉大夫巡撫廣東兵部侍郎簪女子三男二人培德聖增均縣學生聖增少負志節務矯厲不同俗以自標置先君一年卒女一人適太學生趙貴鯤孫男廣鏞廣衡孫女二乾隆己丑某月日將葬君於席安人之封培德余壻也使來速銘銘曰

斑斑之獸弗擾於園噉噉其音於桑之林嗚呼叔六古誰不然而克以有於萬年維

生不羸維後之成以鴻厥聲

韓烈婦墓誌銘

烈婦姓李氏。濰縣李斌女也。性至孝。年八歲。會歲饑。斷炊。父食以餅。留不食。問之曰。頃母出。歸來當饑。洎為副室於同邑諸生韓君夢齡也。佐大婦事堂上。堂上安之。凡饘粥及春榆績紡。紉澣。以及筦簞箕帚。奉負呼召。諸瑣屑事。必身必先。靡逸靡怨。凡八載。夢齡歿。哭撫其所生子若女。以勉自活。未幾復相繼殤。遂絕哭。念韓氏有主者。義可以死。慮家人覺之。佯理故絮。作禦冬具。坦坦如平常。父斌來則泣謂曰。兒不得終事吾父矣。痛吾母歿不及見兒。今日父不悟。慰諭而去。越日。遂自經。磴室中室卑。縣繩長。跪承以項。卒。面如生。殮之日。有香盈室。臨者異之。生於乾隆庚申某月某日。殯於乾隆甲申十二月十日。年二十有五。諸城李進士林以閭孝廉循觀所撰傳來乞銘。曰。烈婦已請旌於朝矣。今夢齡子某將以某年月日葬烈婦於某鄉。而更思所以不朽。烈婦者。願先生銘之。余曰。是宜銘。銘曰。

有餅有餅。心荼口飴。不食兒饑。兒食母饑。母饑兒饑。其僕母歸。率是孝德。以允內則。曰歸於韓。以相我特。非曰我特。惟大婦是式。大婦既孀。哀我未亡。非我未亡。我有出腹子女。牽我腸。今何生為。從兩殤。昔在磴室。米兮如珠。今在磴室。珠兮漣如。死如棄。

如我心則愉有梁庚庚有麻繩繩縣而垂之跪以承從容畢命不殤殤嗚呼烈哉視此銘

國朝文匯乙集目錄

卷十二

王太岳

字基平號芥子直隸定興人乾隆壬戌進士官雲南布政使有青虛山房集

涇水論

送固原齊提督之楚序

高平行紀

劉烈母家傳

周於智

字明遠號愚溪雲南開城人乾隆壬戌進士官河南開歸道

嵎峨姜孝子傳

汪

沆字西顯浙江仁和人諸生乾隆丙辰薦舉博學鴻詞有槐堂文稿

山遊集序

問舍集序

靜便齋集序

包春河太守家傳

翰林院編修何公家傳

邵齊燾

字叔六江蘇昭文人乾隆壬戌進士官編修有玉芝堂集

江揆庭詩序

十五

常熟海防廳署記

十五

湖南按察使嚴公墓誌銘

十六

景州知州屈府君墓誌銘

十七

章烈婦墓碣

十九

碭山縣教諭謝先生行狀

二十

姚

範

字南青號墨塢安徽桐城人乾隆壬戌進士官編修有振興堂文集

揚雄不事王莽辨

二十三

書史記六國世表序後

二十三

張北軒涉江畏語詩序

二十四

朱公墓碑記

二十四

彭

坊

字禮崇一字儀岳湖南衡山人乾隆九年舉人官浙江浦江知縣有鳳庵集

書練子甯先生金川玉屑集後

二十六

國朝文匯乙集卷十二

涇水論

王太岳

謹按秦鄭國漢白公豐利及元之御史新渠明之廣惠與今龍洞渠涇陽新舊志皆云名殊而實一其說非也鄭渠東北行合冶谷清谷濁谷及薄臺石川諸水逕富平蒲城以達同州朝邑史記所謂並北山東注洛而徐廣謂出馮翊懷德縣者是也白渠東南行循涇水逕高陵臨潼以注於渭故漢書云尾入櫟陽是此兩渠取逕本不同矣鄭渠在唐時僅有故道可考而宋代遂云不可復今更無遺蹟矣白渠雖至今不廢然自宋熙甯大觀間鑿中山引涇水東南與小鄭渠會下流二十餘里乃與白渠合則是古今所通號為白渠者乃在三限口以下而其引水出中山谷口者了非當時故蹟則白渠之廢亦已久矣宋渠北移白渠口上五十餘步元渠又移上豐利渠北二百餘武明渠又上御史渠北里餘皆承前代廢蹟而更張焉非因之也今之龍洞雖仍廣惠之舊然昔本引涇入渠今乃即山滄泉昔以引涇為利今更拒涇使不為害制置既別功用亦殊安可混而同之世之論者不惟其是非利病是辨而欲驅今就古以相傳會太史公所謂無異以耳食者也又史傳所書渠事其言或不可曉往往疑於夸誕史記曰渠就用注填闕之水溉澤國之田四萬頃收皆畝一鍾於

是關中為沃野。無凶年。秦以富強。卒并諸侯。以余考之。秦之強。始於孝公商君。惠文武昭襄。而日以益盛。天下諸侯。至於從散約解。爭割地而事秦。岌岌之勢。亦可見矣。譬之羸疾。歸於必盡。其有不同者。遲速間耳。而或者誣舉一日之事。謂始於此。非確論也。始皇之立也。體暴橫之恣。而承六世之餘烈。以雄視六危國。六國者。初不聞有憤發自強。以能與秦抗。方且蹙縮屏息。苟欲延命旦夕。而恐不得。其氣固先盡矣。當此之時。天道人事。皆有不并於一。而不能已之勢。秦特投間應會。而六國之社已墟。故曰。亡六國者。六國也。非秦也。奈何司馬氏遽以是為鄭國功耶。嚮使秦殺鄭而趣伐韓。韓能支乎。向使穿渠而竟不就。秦將終不得吞二周。并諸侯乎。此史家鋪張之文。務在盡意。而不求其實者也。又所云畝收一種者。注云。鍾六斛四斗。而小爾雅二缶謂之鍾。注云。八斛。至淮南子要略篇。注則云。鍾十斛。古說之不同已如此。而今日關中渠田。歲收率不過三四斛。其最豐者。大要四五斛止矣。安有所謂六斛四斗。至於八斛十斛者。又鄭渠注。洛三百里。而云。溉田四萬頃。白渠表。二百里。比鄭渠之長。當三之二。而溉田。纔四千五百頃。十少其七八。相懸何太甚也。矧古今頃畝異制。宋祁謂周制。步百為畝。商鞅以為地利不盡。更以二百四十步為畝。然秦既廢井田。開阡陌。亦足盡地力矣。而是時始為賦。賦從畝出。秦其肯廣畝以減賦耶。必不然矣。

漢書食貨志注鄧展曰古百步為畝漢時二百四十步為畝古千二百畝則得今五頃趙氏亦曰古百畝當今之四十一畝而桑宏羊曰先帝哀憐百姓愁苦衣食不足制田二百四十步為一畝率三十而稅一此當時目見之語當於情事為真而鄧趙之說流傳有本田制改於漢不改於秦審矣由是言之秦猶用周百步之舊則當時所謂四萬頃者正得漢之一萬六千餘頃史特從其多者書之耳不足為據其他書傳同異尤多白孔六帖曰永徽六年雍州長史長孫祥奏言鄭白渠溉田四萬餘頃今止溉一萬餘頃文獻通考曰至大厯中水田纔得六千二百餘頃而唐書云永徽中兩渠灌浸不過萬頃大厯初減至六千畝初疑畝字或是頃字之譌然其下書云歲少四五百萬斛以歲收最豐者計之非百萬畝不能得此數則豈非永徽萬頃之灌浸幾於盡廢故唐書謂減至六千畝而馬氏作通考或者未之詳耶宋淳化間杜思淵言舊白渠溉田歲收三萬斛計其田初不甚廣及至道間梁鼎陳堯叟則曰田存不及二千頃尋使皇甫選何亮相視乃言溉三千八百五十餘頃其後景祐間王汾又言今纔及三千頃元至治初屯田府言溉田七萬畝而天厯間陝西省准屯田府照乃言溉七萬餘頃明廣惠渠項襄毅公自記云溉田八千二十二頃八十餘畝又溉西安衛屯田二百八十九頃五十餘畝而明史本傳云七萬頃余子俊傳又云

國朝文匯

卷十二

二

國學扶輪社印

千餘頃。袁化中則云定灌田八百頃。豈能自贏。縮耶。年代既久。傳聞異詞。紀載之人。各隨所得。書之不能統壹。其為乖牾。固無足怪。至若項公作記。渠實未通。何由逆知。既灌之廣。此必有人希意獻媚。粉飾增加。而項亦樂取其說。以自侈大。正可謂之上。下相蒙者也。由此以推。宋史之三萬五千餘頃。元史之四萬五千頃。大抵皆出之始。建議者計料之辭。與當時有司告報之數。史臣特取故牘。采輯而潤色之耳。則其為書。庸足信乎。昔者莊熊羆請穿龍首渠。以為可令畝十石。及作之。十餘歲而猶未得。其說自古喜事夸功之人。其言往往無驗。宋元之事。殆亦類此。孟子所以取武成。二三策也。或者曰。為其利民也。故亟書以勸。是又未覩於利害之數者也。夫穿渠之勞。豈不可數而知哉。鄭白之工。史不詳其本末。然韓本謀罷秦。秦覺而至欲殺鄭國。則是果足以罷之也。史記平準書。漢書食貨志。皆言番係穿汾河渠。鄭當時鑿漕直渠。朔方亦作溉渠。作者各數萬人。歷二三期而功不就。費亦各以鉅萬千數。白渠之工。詎獨下此。宋之渠以工大而罷者數矣。中間嘗調發丁男萬三千人。屬孫冕督治。而不紀其成。其後豐利渠。屢而成之。而工作已更三歲。元之御史渠。火焚水涸。鑿石尺。直至金二兩有半。積工十四萬九千五百。然且三十餘年而功未成。明之廣惠渠。五縣民更番供役。成之以十七年之久。而鑿不甚濶。泥沙塞渠。雖成無用。是何用力多。

而成功少也。又況召匠貼役，繫椿起堰，下至梢芟芭樣，麻鐵苦索，一切出之於民，民益蕭然煩費矣。宋史曰：造木堰，凡用梢椿萬一千三百餘數，歲出於緣渠之民。夏潦堰壞，秋復率民葺之，數斂重困，無有止息。元史曰：奉元亢旱，五載失稔，人皆相食，流移疫死者十七八。今差夫又令就出用物，實不能辦集。涇陽舊志曰：五縣民八月治堰，九月畢工，截石伐木，掘泥輓土入水置園，下臨不測。十月引水以遠，來歲入秋始罷。已復役作，寒暑晝夜，不得少休，加以官府程督，條約禁限，瑣屑尤甚。近年水脈難涇，沾潤益寡，諍訟鬪狠，姦弊百出。民或上訴，願弛其利，以免劬瘁，有司以故事恒規，不敢輒許。後志曰：自谷口入山，峭壁高巖，陰晦慘栗，絕少人居，宿頓無所。每夫分領一工，身入洞底，搬石爬泥，常須兩三人，在上為之引絙轉送，數人而食一工之食，豈能宿飽？五縣相去或數十里，或百餘里，往返奔命，勞怨可知。嗟乎，穿渠本以利民也，而民之勞費至於如此，非以愛之實以害之。朝廷本意亦豈如此？今夫龍洞則明之，廣惠故渠也，渠之水則山下之散泉也，然而因其已成，不別事穿治矣。收其汎走，不更勞陂堰矣。於是決疏泥淤，完治隄岸，不過費縣官錢數千計，而此數十泉者固已冲融浩衍，合能効技，以畢輸於渠，而流潤於四縣，以視昔人鑿山堰水，力愈勤而謀愈拙者，豈特事半功倍而已？若乃役由和催，而無調發期會之煩，官自購材，而無科

率抑配之擾。役興而人不知。功成而上不有。至矣哉。豈非萬祀之永賴。百王之極則者乎。然是泉也。項襄毅嘗鑿而出之。而龍洞以南。衆泉星列。則尤非旦夕之所可得。然而昔之人。莫有為之計者。何也。引涇之利。孰於耳。而盤固於胸臆。雖有他便利。至於倍徙什伯。而莫與易焉。是故交臂而失之也。向使蚤知變計。如今日。則將遠引深閉。以拒涇。而不暇。尚何穿山治堰。亟困其民。而不已哉。是故古人之法。不善用之。而或足以敗。而善為理者。酌劑變通。雖其陳迹。倣政而常能轉禍以為福。因敗以為功。故曰神而明之。存乎其人。不其信夫。雖然。今日之計。亦有當急者。曰護視隄壩而已。隄之作。亦自項襄毅時。寬七尺。崇二尺而已。然更百數十年。而其功不壞。雍正時始增高二尺。亦數年無恙。乾隆二年。通判羅國楫請於臺使。又增高五尺。未二年而涇水大至。隄竟毀。其後易知縣唐秉剛繼治之。以乾隆四年十月隄成。至八年六月又毀。是何也。隄崇二尺。至不高也。而七尺之徑。則已厚其用。但足以障泉。而不足以捍涇。昔人比之布甌於地。水至則漫而過耳。後之增砌。至於九尺。而七尺之厚。無所加。非獨不加而已。層累之形。豐下而削上。比至其顛。纔有三尺。如是則形單地危。而其禦大水也。無力。而是水也。挾其暴盛之氣。出於兩崖之間。壓隘求急。無所發怒。適與隄遭。則嚙抉掀壓。以圖一逞。不幸而授以尺寸之間。則崩潰遂不可止。勢固然也。

是故治隄之法苟欲崇之則必厚之不然者毋甯卑卑而涇水入焉雖足以淤渠待其過而撈剔爬梳一日夜之力耳高而不厚則水之漲發無常雖更增之尋丈猶未能使涇不入也而崩潰之患其費必鉅而又需之歲月而後完使百姓坐失數時之利故曰毋甯卑也此有司之所宜知也諸壩之制惟洞口為非宜聞之故老順治間金漢鼎實始為此乾隆二年之壩特因之耳金之始為渠蓋猶覲欲引涇既而知其不可引也而見洞中之泉亦足以會眾泉資灌溉於是始慮濁涇之敗泉而置壩以拒其入顧猶低徊顧戀僥倖於涇之萬一可引而姑留洞口之跡以不沒其舊此惑者見也夫洞口之鑿欲引涇也然而常時則涇不受引比其漲盛而濁污乃足以敗泉然則洞口者揖盜入室之計也自順治時至於今又百餘年矣涇流去渠口又益下矣渠泉之為利較然明矣此其與涇誠有不兩存之勢尚何洞口故蹟之足留哉謂宜毀撤此壩以巨石堅塞洞口視其損敝而時葺之使濁涇不得涓滴入而洞泉不得涓滴出則壩之北尚有泉二三孔可以益渠以大其利所謂拔本塞源計無有急於此矣若大小退水槽兩閘水磨橋大王橋廟前溝渠右各壩皆清濁之要限出入之巨防雖嘗設水吏守視而此曹小人不知大計惟務偷安狃於尋常以為無事略不視省或敝損已見忽不為意不以聞官坐使渠水滲漉日減月削猝遇漲水驟

現立見。若此之弊，並須官自檢察，不以寒暑輟按行，不以細小廢賞罰，持久不懈，功利滋多。此日計不足，月計有餘之道也。於戲！國家規措之詳，蓋已斟酌古今，而備具善美。今所言者，皆歲修事耳，然非愷悌君子，盡心勤民者，不能任焉。南陽名杜，其終不可復見。與董子曰：「事在彊勉而已。」歐陽子曰：「職思其位，是豈不在有司者哉？」

送固原齊提督之楚序

西北之戍，通號為九邊。秦有三馬將率之官，列土而鎮者，天下六十有五。佩印者十，秦有七馬，所以據形勢，慎封守，重委寄也。然諸鎮雖擁旌節，專方面，顧其地之大，以要也。又嘗置重臣以護諸軍之事，俾司其節制，而一其號令。於是延綏興漢河州之衆，咸隸於原州督軍之府。而原州左控函秦，右帶隴阪，極睇沔漢，還倚夏州，交枕互蔽，以為四會之塞。士馬之籍，以蹠計者，至於倍萬；以指計者，至五萬有奇。士皆追奔拉虎，奮前而恥後，故常翔踴，謹誡以樂效。一旦之用，而當其平居無事，或御不以道，則且狼顧鷄視，猝無以甯服其心，而盡其氣力。故朝廷選帥，倍慎于他州，誠重之也。乾隆二十年，大岳蒙恩，備兵斯土。時則昌黎齊公以節督秦軍，予得以職事從公。晨夕相好也。當是時，西戎新定，王庭絕幕，空曠萬里，而先登逆醜，奔跳竄伏，轉攝他部，以煽餘燼。朝廷不欲窮示威武，特以彊騎三千，輕行倍進，游徼所至，因順利

便穴燼而枝萌之。然而飛輓無所用其勞。供億無所煩其費。

天子端坐法宮。機神內運。窮遐極幽。列近藩閩。尺一夜下朝以千里。豪盈髮虛動。應機會。陽施陰闔。翕習若神。羣公僇力。肅龔廟謨。郡縣吏民。風行波涌。咄嗟集事。而太岳初試吏職。罕所更涉。每奉符牒。怔營累息。進而謁公。方且指顧笑語。靜若無事。退而考公之為。精敏明密。皆若夙辦。所部數千里中。智力齊一。呼噏運轉。如左右手。軍書檄發。未嘗後時。予固已心異公矣。然公平時不用一切苟且之法。動教課謹名實。明賞罰。人皆兢兢。莫敢慢惰。顧其既久。眾情益親。吏士材鄙。無不盡力。家門老穉。小大之業。無不周知。疾痛患苦。無不可告訴。公私悅樂。人以大和嗚呼。其可謂能也已。公所歷官。咸著名蹟。然而原州最為久治。比戊寅正月。有詔移楚。於是公帥秦七年矣。士肅於伍馬。實於廐軍。府內外細大之務。秩然條理。吏特通諮啟謹。亭埃而已會。

上以公所撫士為可用。既悉發精銳以誅逋賊。又會前所遣輕騎連戰有功。黨與略盡。渠魁自殲。旁近諸夷。以次即序。旋師飲至。時日期指。公方坐幕府。擁賓佐。撫摩嘯詠。以樂無事。而新除遽下。受代且有日。於是觀聽之情。以為公之政既成。勞既積。而公亦已去矣。太岳辱與公交為久。故於其行也。意既不能自釋。而公之吏士奔走朝

文。謀所以留公而不得者。亦將託於予文。以道其戀思。以庶幾公之不遽忘於此土也。亦聊以比於古之贈策者而已。

高平行紀

乾隆二十有四年冬十一月甲子。制詔定邊將軍。國家既定西戎。通道大宛。所以拯遠。毗固。外圍。伐罪。舍服也。葉爾啟。木霍集。占。蟻。蠶。類。役屬。準。夷。恣其。輔。轡。既蒙我大恩。予之安輯。而興心背畔。造作事端。自蹈不赦。天討有罪。朕不敢違。用遣偏師。往致厥罰。賴

宗廟之靈。師武臣力。以數千之衆。蹈萬里之遠。曾不數月。誅之既畢。朕以將軍吏士。久勞於外。如饑飲渴。冒涉霧露。側席遠望。惟日不甯。將軍其第錄功。覲具以名上。因帥以來。還即厥次。夫賞罰國之大柄。旌有功。恤有勞。今古之彝經也。大官茂實。朕無差焉。已敕所在。具芻糗。戒輿馬。以待將軍。師至之日。予郊勞汝。臣兆惠聞。命震懷。手足戰掉。遂開軍牙。樹旌伐鼓。召集賓僚。裨佐千百夫長。熊羆號虎。至於偵騎。傲卒。咸進幕下。軍吏升高宣。制具道。

陛下恩德。所以嘉勞寵惜之意。軍中皆頓首伏地呼萬歲。既上章辭不獲。命乃以某日振旅。而先馳牒酒泉。以其期約。次第告於制府。轉相詔報。無有後時。於是巡撫

陝西都御史以符下所司。曰：各執乃事。惟飭惟豫爾。則究圖已而曰：懼無以稱。明詔師來有期。使者將逆之境上。汝布政使某往臨潼。按察使某往咸陽。鹽驛道某往邠州。惟是寓望迂勞。饗至送歸。各率乃屬。賁成盛禮。咸拜手曰：敬諾。又曰：隴右歲比不登。民用曠於畜牧。師徒經行。慮不能供億。平涼涇密近於邠。猶吾西鄙也。汝具官某。其率官屬車騎以往。均勞佚之。爰既厥役。毋同越人。某拜手曰：敬諾。明年二月。師入嘉峪關。河東西郡縣小大百吏咸奔走即事。某乃詣大府受教戒。府曰：汝行遂行。甲子發長安。行四十里。渡渭水。帆檣驚列。權謳和聲。炊煙起沙汭上。上下雲水糾結溶漾。壹體虛無。莫極其往。軒車既至。蒿師估客。逡行岸處之氓。駢肩聚觀。聞官軍遠皆相顧以喜。過咸陽。行二三里。萊田始華。麥畦綠縹。微風遠起。飛黃偃翠。蕩若波靸。前有修林冢祠。離立是為周文武王之陵。左右高岡。鮮原極望。華秀慨然。想見西京之盛時。是日行九十里。宿旬章驛。館明日行百二十里。宿監軍鎮。又明日飯永壽城南。西出郭門。便入谿谷驛。路傾仄。與山委蛇。雲氣起巨壑中。滇涌盤薄。欻忽東西。橫斷車馬。五步之內。不辨面目。登頓既久。得郇氏莊。稍聞澗水潺潺。馬蹏行石路上。脰膊相齕。遂渡石橋。出太峪之口。陂陀連延者又三十里。以抵於邠州。是時南景初傾。牆陰著地。不盈一仞。得某氏竹園。遂不能去。園中木芍藥數本。綠跖丹苞。粲然欲笑。

乃具茗餐。邀同行屈生。藉草對坐。歎息不能留也。早起周行城郭。并屋潔修。百貨肆列。已而街鼓競發。老嫗羣嬉。歌舞繁會。秋千畫板。錦棚雕檻之盛。夾道相屬。此邦故號貧薄。及是乃蔚然極觀。知州事者為曹縣武若愚。歎其精敢任事。具著理效。流覽久之。乃去。州之西二十里而近。得幽風閣。依山梯架。築構三重。像設森列。皆即石壁鏤而離之。妙極天巧。中列大佛。紺頂金身。高倍丈六。下臨洞壑。深靚不可窺視。微聞流泉。繞佛足下。璆然有聲。前出平臺。臨瞰無極。百里內外。可見飛隼。迴望平田如掌。雲樹彩錯。花源果林之觀。連阡被畛。東盡州郭。自是以西。皆連山夾峙。貫以涇流。波聲挾山足俱東。其來益三四百里。予乃策馬溯流而上。疾走兩日。遂摩涇州長武。以抵平涼。而假息於督學之使院。是為月之二十有三日。聽夜漏四鼓。遂寢。明日官吏來謁。問其饗餼。次舍供頓之物。良具。頃之。傳吏來告師且至。遂相率往迎於郊。初出重閭。下漁梁。延緣濠上。盡城之北。爰有大旆飄蕭。營壁屹立。是為寓軍之次。右列阜。棧廐馬千蹏。未至數十武。聞鼙鼓聲。如空山夜壑。風泉撞捩。喧生靜中。即聽彌遠。左即行營。纓幕周阿。外瞰壁列。內睨洞明。簾帷闔開。門戶當對。狀若區廬聯比。而常虛其中。方以正四嚮之位。而筦其出入。於是表以綽楔。樹屏當門。錦幄中張。參佐拱衛。前者翼舒。後者箕繞。其外則平沙綠草。微道所環。堅轅鱗次。桂柅牙錯。總其為制。廣

輪一里而又半馬。規圓象天。截地應矩。仁立遠視。隱然壯觀。已而掘堞。霧合鏡蕭。殷雷幢牙。茸叢合沓。纒繞咸按。轡整行來。居求處其。士伍皆陽陽和愉。顏色不勌。其將率皆恭儉退讓。以能有功。下馬握手。與之慰勞。視其膳飲寢處。茶話久之。又握手珍重相揖而退。步出營東門。地益亢敞。側望前村。桃李盛開。亦有茶火之色。背山繞流。林木畏佳。風開日穿。茅茨高下。鬱然清遠。尋野人問路不得。故不能遂往。南行數十步。得暖泉。柳湖所自出。明韓藩建築館於此。山池臺榭。勝絕秦雍。東北望有廢城。周遭故苑牆也。泉在龍公祠下。水從石甃中湧出。纔若沸鼎。稍行而東。渠流益大。乃醵以方塘。鋪以澄沼。東以隄柳。平波澹蕩。薰綠滄泓。柳岸之北。因其高庫。以為鳴泉石瀨。淙然清響。具體巖壑。旁近人家。竹林蔬畦。魚陂水碓之利。咸所仰資。於是為之沙洲坻嶼。迴潭枉沚。詠以鱸鮓。暢以沙鳥。冒以菱荇。青蒲芙蓉。水物之奇。並皆含氣發英。翠如雕玉。波煙橫流。雲景交集。陰陽晦明。儵爾萬態。於是吟池上之篇。歌大隄之曲。遂出占城。入定北門。歸於所謂使院者。而憩處焉。院在郡城北。絕遠民居。方廣數百畝。遍滿瑤草。長日無人。幽禽怪羽。飛鳴沓集。往往巢於簾桁之上。庭前槐柳交陰。丹杏碧桃。玫瑰刺桐。護草之華。羅生簷戶。又有小柏四五株。體狀詭異。上枝攢擎。下幹突怒。側生仰出。儼有屈鐵之勢。所居堂廣八楹。深七楹。甑甓負地而起。高出雉堞

對面西南諸小山皆如列几曾岡偃隴鱗鱗滿前日之既夕景色益奇遠望崆峒山
骨稜稜可數瀑水懸流晃漾落景嵐陰迴復紺煙紛橫樵歸鳥沒可攬而有於是鱣
魚鱣帶菌筍銜杯拄頤目盡餘曠酒尊三屬頽然徑醉浩乎栩栩遊於華胥瀆洞寥
沆觀物之初混混然不可窮矣既醒客問曰吾子于役他邦而縱陳觀遊歡歌從容
豈誠有樂乎此耶抑將有所病而聊息乎此耶余應之曰然非此之謂也夫春至而
倉庚鳴淵閒而儵魚樂豈嘗有警發詔教之者哉感氣而動樂得其所者生物之
共情也今吾與子生堯舜之時沐浴德禮涵浸聖澤近清光咏醇懿之日久矣比
者王師西征不庭掃逋逃之淵窮走險之路渠魁凶孽以次即誅德威所加闔地
二萬海波不飛物遂卵育樹候置尉邊圉大甯西土之人效其筐篚壺漿以勞還旅
行者歌坐者望童兒牧豎無不拱手跣踵笑言愉愉而況詩書冠帶之類感動之深
者哉且吾竢罪於此邦者嘗三年矣才既駑怯又不習吏事每軍書夜下徵發倉卒
奔走圖議惴惴焉惟不任是懼又於其間隕霜雨雹未嘗告災按部所至率皆戴星
宵行憂心如疚是故山川之美華實之植雖狎習之久而若未嘗接於耳目及其既
去二年復以職役來往於此遂得親見吉甫方叔雷霆江漢之威退而作為詠歌以
道生民未有之鉅烈於其稍暇又得留意於景光風物以紓其倦飢而暢其和豫則

吾之適適於此豈不宜乎。故曰哀樂變於中。境象移於外。漆室春慄。狐裘冬溫。又曰。吹萬不同。而咸其自取。子非我也。又馬知余之樂哉。乃為歌曰。方春時和。百物昌兮。酌以大斗。挹天漿兮。海宇曼壽。和樂康兮。客既喻。相與踴地起舞。引聲和歌而去。

劉烈母家傳

劉太守斯和以翰林用大臣薦。出知忻州。改遼州。補秦州。遷知甘州府。溫恭有執所。至稱惠。太岳以館署後進。又同宦隴右。嘗得習聞其家世。暇日更述其高王母死賊事。請為敘錄。以為我劉氏永永無窮之傳。以紓我嗣人之戚。而惜乎其聞之不詳也。太岳正立握管。謹次其語。為劉烈母家傳。

傳曰。烈母姓馬氏。鄉縣臨渠劉翁妻也。翁居鄉多惠愛。盜伐其屋後樹。翁望見。輒屏匿卻走。盜得從容捆載去。舍南有蔬圃。里中兒日往來採擷。或詰曰。若何從市。此對曰。吾取劉臨渠家菜。不為盜也。其厚德如此。烈母為翁繼娶。能與翁同志。翁好施予。母無忤色。翁或遭謾欺。相顧益喜。曰。非君盛德。其何敢然。於是鄉人謂翁夫婦長者。卒相親附。聲動鄰邑。翁既沒幾年。而中原盜起。大轡河南。焚掠州郡。鄉汝之民皆空室以走。家人來告曰。寇至矣。請亟去。母織不顧。則又請曰。寇大至。不去禍且及。織仍自若。已而呼告曰。寇及郊。又告曰。寇及郭。又告曰。寇及門。遂連呼曰。寇入矣。不蚤去。

以及於是。母罵曰。豎子。賊搥地至。吾婦人去將安之。雖然。義不可辱。賊手趣走。後圓沉井以死。家人曰。奈何。母獨死。即俱死。賊無所發怒。下巨石壓之。盡燬其廬。乃去。其子自它邑歸。撥瓦礫。收諸骸。而出母屍井中。瘞其旁。大椿樹下。鄉人呼為劉烈婦井。論曰。嗚呼。予觀史冊死節之士。往往至於糜肌碎首。而其氣不屈。豈不烈烈丈夫哉。然嘗竊怪天地變亂之氣。至使盜賊兇殘。得親肆其毒於忠孝之身。此其可為流涕悲呼。發憤太息者也。況於婦人者。潔身為義。又不必其奮臂嚼齒。而後為快者哉。若劉母。其可謂從容正斃。灑然完節者矣。觀其平居。門內恂恂順正。務以為善。相踵勉而已。至於生死之際。顧赫然若是。然則鄉曲之譽。又何足以知之哉。予既高其義。思得考竟其本末。而紀傳不著。雖其子孫裔世。亦有不能詳焉。豈非世變倉卒。愈久而失之耶。嗚呼。從古亂世。尤多偉異奇節。明之末歲。窮山荒陬。閭巷夫婦之賢。蹈於義以死。而名不彰者眾矣。可勝惜哉。可勝慨哉。

嵒峨姜孝子傳

周於智

滇有孝子曰姜瑤字美玉其先江南人愛嵒峨山水築園於南河濱遠家焉代有聞人而清可公尤善詩故嵒峨有姜詩之稱瑤父文柄詩人清可之裔也性嗜飲每貿易得錢輒償酒債瑤痛母蚤逝事父先意承志竭力供子職無缺娶趙氏生承宗承先趙故繼娶楊氏賢克相夫志相與操作養親宗族鄉黨嘖嘖稱孝內外無間言親嘗遠出久不歸音信間寂瑤感甚乃訣妻子裹糧周尋遇父于元江相持大慟勸之歸乃喜家貧析新治園為養先儘父酒資餘膳晨出採薪必挈壺置肆間反攜酒刈蔬妻潔治以進家庭聚順融融然樂也間或因事偶滯疾歸妻楊已命子取酒奉親矣厥後家益貧父為罷飲屢勸不聽命子承宗跪請曰孫力能負薪矣吾父給衣食孫供祖飲裕如也祖非飲不樂奚自苦為翌日適山樵採買酒以歸共勸酣飲嗣日習以為常及親歿哀毀骨立喪葬不遺餘力春秋祭提父嘗飲壺薦酒哀慟墓前壺至今猶存楊氏卒無子又娶關氏生承澤聰慧能讀書有其先清可公風承宗承先力圃護事瑤瑤五十壽終今人過南河稱其園為孝子園

贊曰書云父母慶乃洗腆致用酒至性之醞釀者深哉世俗好飲酒不顧父母之養不孝也曾子養曾皙必有酒肉孟子曰可謂養志吾於姜孝子亦云

山遊集序

汪沆

予甫冠學為詩。請於先生長者曰。詩何繇而工。長者曰。亦多讀書多游覽耳。時方事科舉。學聞而置之。稍長。盡取古人詩諷誦之。見其意境甜閒。神鋒標映者。大抵模山範水之作居多。而曩時長者之言始信。丙辰夏。北走京師。歷吳楚齊魯燕趙諸地。凡三千餘里。舟衝洪波。車駕巍坂。際羈愁無俚時。每託歌詠以舒其鬱。輻困苦之思。詩不多作。作亦不能工。又疑所聞長者之言為不可信也。尋客津門。獲交查君蓮坡。蓮坡少負逸才。輾轉不遇。手闢水西別墅。貯書數萬卷。枕肸其中。日事嘯咏。性好游。聞有佳山水。不難重郵累駕而往。顧興旋發。旋止。予私叩之。蓮坡應曰。古人之游。有所乘也。我人之游。有所俟也。雖然。盤西二山。近界畿輔。曾一再陟之。而且咏之矣。知予之游者子也。知予之游之未敢遽遠者亦子也。子不可以無言。予受而讀之。終卷若穹巖窈洞。近接於目也。雲霞蔽虧。朝霏夕煙。縈拂於几席戶牖也。幽泉之琤琤林籟之蕭屑。與夫樵吟梵唱禽鳥之音。遞於耳而互會於左右也。不禁作而歎曰。詩之工拙。果繫於游哉。然有難以理度者。假詩必游。而後工。盤西兩山。裹糧擔簦者。一歲之內。趾相錯。肩相摩。不知凡幾。或游矣。而不必能詩。能詩矣。而不必盡工。即以予之弁陋。隔歲常策杖兩山。所作都凡近。然後知蓮坡之詩之工。雖結癡於山水者。深實亦

讀書之多。有以陶爲其靈能。而抗懷於物表也。則予之請益於長者。不當徒求於游。而向者之說。洵無可疑也。州有九厯其八。嶽有五。陟其四。予知蓮坡。猶未厭意。他日行篋之作。定有什伯於此者。當與少陵入蜀東坡海外爭雄矣夫。

問畬集序

吾鄉舊以文章相雄長者。必稱西冷十子。三十年來。自慶伯吳氏。鴻文徐氏。山公馮氏。數公殂謝後。號稱能文者。不少概見。吳翰林志伊著十國春秋。具良史才。初白查氏。西厓湯氏。以工詩鳴海內。而文章均無傳焉。則希風繼軌。誠鄉里後學之所宜自振者也。同里余子月樵。質敏而勤學。以貧故。負米京師。既而僑居津門。與予交。襲其所製文若干首。問序於予。予弇陋失學。於古作者。未能窺其庭戶。詎足以序月樵之文。無已。請以命集之義。爲月樵誦可乎。易无妄之六二曰。不耕穫。不菑畬。言因時順理。無私意期望之心也。爾雅稱一歲曰菑。二歲曰新田。三歲曰畬。詩詁謂菑者。始反草也。畬者。漸和柔也。文之爲道。甄綜羣籍。酌雅稟經。歲者休之。蕪者剔之。不使亂吾佳植。是反草之說也。迨遲之久而氣充。理洽。猶滋之以水泉。蘇之以土硯。使良苗懷新。是和柔之說也。抑予聞之。文者載道之器。非可以驟至。逸獲者也。使乍營苞種。即腰鎌以隨之。縱無稂莠之雜。而植本不固。生意未足。歸於無成焉已矣。必也自苗而

秀而實。勿奪時。勿助長。盡人之事。以合於天。斯力穡有秋而不致歎美稗之不若也。月樵之於文。用力也專。歷時也久。取材也博。乃猶慊慊不自滿。曰。如何新舊。吾將問之。推其默然自下之意。將見腴壤所產。實好實堅。異時吾鄉有好事者。網羅文獻。蒐討別集。則十子諸君之外。必及月樵無疑也。

靜便齋集序

嗚呼。此予亡友王君茨檐之遺藁也。予與茨檐同居松里。年齒相若。契厚如昆弟。憶雍正乙卯。石交黃君西清。為繪松里五子圖。五子者。杭君董浦。張君南竹。符君南竹。茨檐及予也。荏苒三十年來。日月不居。故交零落。南竹。相繼殂謝。茨檐之歿。抑又八年矣。吟場酒地。徑草為荒。每過諸君子舊館。不勝黃公酒壚之感。今予羈迹吳門。董浦又掌教揚州。間年始一見。益歎友朋聚首之不常。而感逝傷離之難已。於懷抱也。茨檐食貧力學。手未釋卷。又嘗假館於繡谷吳氏。小山趙氏。養素王氏之三氏者。儲書最富。茨檐左右漁獵。肆力為古文詞。多見道有得之言。生平不修飾邊幅。和易可親。然遇要人富兒。有不當意者。即掉臂去之。或竟日不交一語。其狷介又如此。性嗜飲。時時從酒人游。跌宕自喜。中年絕意進取。不踏省門。捐館前三日。自哀所著詩。屬予定其去留。而以文丐董浦論次。若逆知怛化者然。斯亦異已。夫年壽有時而

盡榮祿止於其身。惟文章為不朽之盛事。次檐既窮以死。其遺文何忍令湮沒不傳。襟契之好。共謀醖錢以授之梓人。俾來者讀其文以哀其遇。次檐其亦可以無憾也。已。顧南竹秋聲館吟橐。次檐曾手書以開雕。南漪文集。鏤於粵東。董浦述作等身。門下著錄之士。不難排纂。鏤板以播於通都大邑。獨余抱落無容。垂老善病。欲假秉燭之明。息影里門。而不可得。檢點昔年遊歷酬倡之篇什。半多散佚。其僅存者。不堪覆瓿。謬廁諸君子後塵。披覽前圖。載翻遺集。追念存歿。既傷且愧也。

包春河太守家傳

君諱濤。字春河。號梅嶼。錢塘人。少孤。淬志勵學。文詞卓犖。康熙辛卯。以詩經舉於鄉。雍正甲辰。成進士。授刑部額外主事。君辰入酉出。不敢一日曠。每語同官曰。獄事人命所繫。尤當盡心。漢張釋之。唐徐有功。皆以恕求情者也。吾黨當師之。衆聽其言。居西曹五年。多所平反。歷陞本部雲南司郎中。己酉。特授甘肅平涼府知府。下車洗手奉職。整飭綱紀。杜絕苞苴。一郡竦然。前守某承造運糧車二千三百輛。并軍營所需鞍。扈繩。索。毛。槽。鐵。叉。輪。輻。鐵。掌。等物。十未及三。遽報工竣。奉檄起解。君歎曰。軍國重事。予敢諉過前人耶。遂不惜工直。晝夜督造。剋期而成。幸免戾譴。明年。調任慶陽。地屬邊陲。李自成蹂躪於前。王輔臣倡亂於後。民俗彫敝。君至謀生聚。復流庸。革規。

例禁苛擾。務為寬大之政。以紓民氣。遠近德之。所屬環縣土多沙磧。又皆峻阪陡崖。氣寒霜早。歲僅一穫。洊饑後。丁壯皆轉徙四方。嗣奉墾荒之令。土著無產。及流寓客氓紛紛報墾。比流亡漸還。各以業主告。爭鳴官清丈。君思沙磧磽确。不同膏腴。而頃畝向無弓口。脫一清丈。既罹侵隱之罪。復貽加賦之苦。因援延安府屬折征起科之例。剴切陳詞。申請臺使。奉文報可。環人稱便。癸丑。緣事醵秩二級。罷歸。乾隆己未。補江西贛州府通判。大吏廉君名。屢行檄委。署郡篆四。攝丞縣事三。司樞務一。所至皆有聲。其署贛州也。郡學鄉賢祠燬於火。捐貲復之。監造站船。侵扣冒銷之弊。釐剔一清。庚午。分校文闈。檄棘知名士。壬申。推陞雲南澂江府路南州知州。引年乞休。君宦遊三十年。篋無長物。歸田後。每日晡不能舉火。家人詬詈勿顧也。事母李太安人極孝。既歿。宅兆未卜。盡馬心傷。力疾營葬事。手操舂黍。淚泫泫交睫。蓋終身孺慕如一日云。包氏故錢塘望族。占籍保安里。則自有元諱泰者始。科名文章。代有聞人。君輯包氏簪纓錄一帙。末系以圖。用展敬宗收族之義。撰述所存。有說書旁見三卷。邨廊衛三風詩意一卷。左國朽言一卷。三才備考四卷。唐詩律隔一卷。讀莊解若干卷。昔昔編一卷。則君生前自編年譜也。詩四卷。夏邑彭樂君方伯先為鏤版行之。卒年七十四。無子。以族姪全嗣。女五。竝適士族。

論曰官箴之美莫過於廉官箴之戒莫甚於貪。厯覽史冊所載循吏諸傳鮮不以廉自律。克著清白之操者也。迹君生平處脂膏之地未嘗以纖毫自潤方古廉吏何多讓焉。嗚呼是可以傳矣。

翰林院編修何公家傳

公諱玉梁字韋江號樟亭錢塘人。祖蘭旌明季杭州府學生。績學多隱德。學者稱江許先生。考喬雲康熙丙辰進士官湖廣桂東縣知縣有循聲。公幼即穎異五歲入家塾。與兄某以記誦相角勝。日誦數千言。晚課畢私以他未誦者益之。稍長工韻語。受業蕭山毛西河檢討門。學益進。康熙己卯。

聖祖仁皇帝南巡駐蹕杭州公隨父迎鑾擬撰應制詩若干首以年幼格未上檢討為之序載西河全集年十七補錢塘縣學生康熙甲午舉於鄉雍正癸卯成進士改庶常時新進士始行九卿保舉例而御試詩文為尤重公於九列無薦擢特以文章稱旨拔置詞臣掌院雅重公凡館閣制誥多屬公撰擬進呈宸覽甲辰授編修充大清一統志纂修官丙午充順天鄉試同考官得沈澗張受長王延年等十四人皆知名士丁未以母喪太君患風痺疾陳情終養歸制府彭城李公廉公名延掌紫陽書院講席自己酉迄丁巳凡九年公持文律甚嚴一字一句之疵抉摘不

少恕遇英俊傑出之人亟首錄以為程式以是爭相鋌厲門下士掇巍科成進士者先後百餘人居恒訓士每引安定規條務求有用之學曰讀書內而無益於身心外不能通達世務雖胸羅萬卷謂之書簾可也生母李太君廣東新會人先是康熙甲辰山寇竊發舉家驚竄太君年十歲陷於賊貝勒某公勦平之凡寇所掠子女航海以北抵京師沁水縣縣丞裴某公嫡母父也倡義贖難民百口得太君詢其父兄名姓里居悉數不忘異之撫為女遂勝裴太君同歸桂東公生公太君居杭時時思父母不寬常為公道王覺經尋親故事慨然而歎曰子雖隨汝父在桂東時一見吾父而今又若干年矣汝異日能至粵一訪里居乎言已嗚咽不自勝公恐傷太君意附舟入粵比至太君父已歿舅氏徙居香山造門謁見具述太君遣行意相持而泣留一年歸蓋順承母志終身如一日云甲子夏徽徽衢三郡起蛟大水溺人壞廬墓棺槨浮江而下公傭夫駕舟自富春江至龕赭之間出沒巨浪撈浮棺五十餘慕義者接踵而起閱三晝夜又得二百餘具於是編號繪圖沿途黏示俾子姓認歸其不可識者逾年瘞之己巳蕭山令聘修邑志公校閱舊本多改竄前史而飾為美詞其未見正史者官階年號亦偽造居多公細加校訂如前明何孝子競父醒庵侍御以湘湖水利故為邑令鄒魯所殺孝子報讐事具明史舊志削去父子二人傳以他有勢

力者當之。公憤曰。父以地方公事死。子為報讐。死煌煌國史。尚不能沒。而獨不見容於邑志。公道何在。於是擔簦尋孝子逸事。其一時同事。例應並載者。得書十餘種。為孝子立傳。是夜陰風寒慄。鐙焰青熒。室中若有鬼神者。人以為異。何氏自上虞縣遷杭三百餘年。支族繁衍。桂東公曾輯家譜。閱年久。未有續修。公依派編圖。增立傳記。較他姓譜體例為詳。公讀書於諸經中。尤邃於周易三禮。嘗論易曰。易聖人之書也。所以明斯道之變。易無不在也。王弼間以老莊虛無之說參之。誤矣。顧言理學者宗程子。言數學者宗邵子。朱子作本義啟蒙。乃兼二說窮極古始。謂易本為卜筮而作。謂邵氏先天圖得作易之原。謂程子言理甚備。於象數猶有闕學之未至於此者。遂亦翕然嚮往之。揣摩圖象。日演日高。以先天為先。以後天為次。而易經反似承其流矣。然程邵二子。生同時。居同洛。相與二十年。天下事無不言。程子獨不與言易之數。邵子每欲以數學傳程子。而程子終不欲。邵子既沒。數學無傳。今所存之空圖。殆不能調絃者之琴譜。朱子雖為之訓釋。他日有富王子合書。亦自有康節說伏羲八卦。近於穿鑿附會之說。則學者亦當兩酌而審所當務矣。其論三禮曰。三禮之學。其所以訛異者。其端有四。有出於前人之所行。而後人更之者。有出於聖門而傳之各異者。有後世諸儒損益前代。自為一朝之典者。有專門之學。各自名家。而以臆見為先代。

之訓者。察乎此四者。而諸家之聚訟。可以折其獄矣。又曰。歸熙甫作孝經敘錄。謂其所去者是矣。而所存者又未必純乎孔氏之舊也。則莫若俱存之。自秦火之後。諸儒區區掇拾灰燼。而文藝之全者。眇矣。非孔子復生。莫之能復也。今世所存如孝經家語大小戴之記。要以為有聖人之微言。故莫若俱存之。而待學者之自擇耳。歸氏之論。洵為讀書不易之良法。嗚呼。誦公之言。可以知公之學識矣。所著有韶齔吟四卷。賢鑒堂詩存一卷。應制格詩一卷。南齋記聞四卷。史論十二卷。柳浦集四卷。藏於家。沒年六十九。子四。陳調。乾隆丁巳進士。河南鞏縣知縣。維熊雍正乙卯舉人。湖廣祁陽縣知縣。陳鯉。乾隆辛酉舉人。陳燾。仁和縣學生。孫四人。

江揆庭詩序

邵齊燕

余年十三四受業萬川江先生。先生之從子揆庭。時時來省先生。聞其有能詩名。顧余尚少。不知揆庭詩何等也。後十餘年。余官京師。習聞揆庭詩。益工。名藉藉而未見其所為詩。又六年。余以伯兄之喪。乞疾歸。揆庭出其詩一編示余。且謂之曰。吾自少來所為詩。吾既擇而錄之。若此矣。然吾猶病其多也。子盍為我刪之。余讀其詩。已復于揆庭曰。余非知詩者。何能刪子之詩。且子之詩。又何待於刪也。世之論者。皆曰。古之人所作不多。而其人傳。後之人所作。倍蓰于古人。而或不盡傳。以後人之所作。與古人之所作。較其多寡。則古人之傳者常少。而後人之傳者常多矣。以後人之所傳。與古人之所傳。較其高下。則古人之少。遠過於後人之多。其所以傳者不同也。居今而觀唐宋元明之間。人各有集。大抵世愈近者。其卷帙益煩。及進而溯之魏晉。以迄周隋。其間作者。鱗次然。卷帙抑差少矣。又進而溯之兩漢。則多不過人數篇。少者僅一兩篇。然其人其文之在千古。其光氣照耀。不可磨滅。為何如也。即以詩論。唐人詩集之最多者。莫如李杜元白。然視子瞻放翁石湖誠齋。其卷帙之繁不及也。若曹劉陶謝鮑庾諸家。其存者抑又少焉。至於蘇李贈畱。以及枚乘傅毅無名氏之詩。世所稱古辭者。皆上繼三百篇之遺音。下開列代之體製。然其存者若斯而已。而世之人

卒未有能謂蘇陸之詩可掩李杜曹劉之作可駕蘇李者也然則詩之傳固在於多乎哉子之欲刪其詩也或者意在此乎顧余獨以古今人文之不相及者氣運之相乘才分之相懸使然而不在所傳多寡之間其所以有多寡者世遠則篇籍就湮時近則流詠未替而不必據此以定古今之判也使唐宋之人生於漢魏其傳者未必不少使漢魏之人生於元明其傳者未必不多然使古人之詩文連篇積軸疊疊成集如後世人之多其所以勝於後人者自在也未嘗以多而賤也又試取近世人之集芟奪翦截僅存一二使如古人之少其所以不如古人者自在也未嘗以少而貴也夫詩之傳又豈徒存於少乎哉子今者將毋徒以少為貴耶抑將漸至於古人以自為其可傳者耶如將漸至於古人以自為其可傳則子之詩方將躡元明之軌轍軼唐宋之藩籬排江左之門戶挾漢魏之堂奧日增月益必有更多於此者而又奚以刪為且子不聞之乎隨侯混于魚目和氏雜于碲碲則必將去其似者以明其真者矣若夫懸圃積玉無非夜光合浦孕珠皆成明月彼觀者方且傾盼睥睨之不暇又奚能有所去留取舍于其間哉故曰子之詩不必刪也既以言於揆庭遂書之以為序。

常熟於蘇之屬邑中獨濱於海其水利開塞之宜市舶出入之禁為郡利病所繫而郡守不能親治其事乃設海防船政廳以董之廳署舊在縣城之東偏建自康熙四年至雍正二年官省八年值今相國海昌陳公方以東撫管江南水利事邑中通海之道福山白泖徐六涇諸口皆以次濬淪乃討曩時官制謂海防同知專以飭船政稽海口為職是宜不可廢請于朝得復置太倉故郡屬時太倉已改直隸州而太屬船政仍隸于廳從其舊也初官之既廢也會廷議析常熟為昭文遂以舊署為昭文縣治至是復置別于昭文之福山城立署焉常昭舊有潮患而福山去海尤近乾隆十二年秋署為風潮所圯前司馬僦城北景氏之別業以居既湫隘不足以展事且念非經久計十七年乃請于大吏重構廨宇於城內如舊制事聞下部議得如所請權其費給帑千五百餘金未及行而陳君擢員外郎去二十年三月今司馬李君始蒞官則求閒敞之地可以為治事之所者經歲得陸氏之居于常熟西子游里乃度材鳩工揆日作堵凡楹栢之腐折者易之墉壁之欹頽者築之丹堊之剝缺者飾之其公費有不給復輟俸以助之以今年六月始落成而居焉有堂有除有寢有庭非侈非陋制度具備可謂高明之居君子攸芋者矣工役既竣李君使使告余為文以記之余辱與君之子庶常有門館之雅又竊喜斯役之不日成也其敢以不文辭

因考茲署之沿革廢置而述其大略如此若夫李君之公明慎勤以惠于民而能其官者有兩邑之輿誦在余不具論陳君名某字某直隸天津人李君名某字某山東壽光人後之君子洎是官而得其居以治乃事者其無忘厥初是役也相陰陽諷吉良則邑人某計工值督畚鍤奔走執事者則廳吏某常熟工房吏某廳役某某例得牽連附書。

湖南按察使嚴公墓誌銘

公姓嚴氏諱有禧字厚載常熟人明大學士文靖公七世孫也曾祖熊縣學生祖虞懷一甲二名進士授編修終太僕寺少卿父鑑增貢生宗學教習公初名繼德年十六補縣學生太僕公時為大理寺副手書勉曰易曰厚德載物今字汝厚載入則孝出則弟言忠信行篤敬所以厚其德也康熙五十九年年二十七以今名中順天鄉舉雍正元年會試被放

特恩賜進士六年選河南涉縣知縣河東總督田公文鏡為政嚴明屬吏望風懾慄公強直敢任事議論明決數見褒異自以不習吏事請改教諭田公曰汝豈久為令者顧涉小未展驥足勉之勿萌他意八年調署洛陽值西邊用兵羽檄旁午隨方應接事無廢滯田公益親任之逾格舉薦明年遷山東直隸濱州知州是時田公與山

東巡撫岳公濬不相能欲求其不職狀故奏公為濱州使察動靜公至見岳公長者久之竟無所白曰吾豈能譖人以求進乎於是田公以公負己大怒謂讓相繼將劾公會病卒乃免濱州仍歲大水公到官三日單騎循厯所屬按視災口開倉賑給撫恤勤備十一年遷萊州府知府聽斷明審辨析疑似誣枉獲伸廢阻蔽欺咸見糾摘政號清嚴法制有不便於民者具以因革所宜列上兩院究徹利病言多見從

今上乾隆三年擢公登萊青道前時胥役奉命參訪外事因廣興譏構迫脇州縣恣取賕賂公至禁絕其事有踵故私出者聽州縣捕治循行界內簡省徵發所至晏然五年調糧儲道母憂去官其冬復遭父喪八年服滿補湖南岳常澧道民隄湖旁涸陂為田水勢屈遏往往決溢而民利墾闢請者相繼兩院下公勘狀公言此皆遊食好事之徒散誘愚魯恣為科斂與胥役表裏分畝分金及至衝決告災求賑復為奸利因條上其弊圍湖之議遂格澧民蕭六表素兇邪告所怨劉太玉譚如山有逆謀諸生車馬殿等名在告中湖南提督聞知遂捕繫生等會將肆兵於澧民訛言兵至相率驚竄公察所告非實竝為伸雪縱遣而馳書帥府止其肆兵澧民乃安十一年調驛鹽道十三年擢河南按察使十五年冬調貴州禁制兵役不得侵凌苗民刑具違制被刑者多斃督令重造如制十七年以疾解職二十二年疾平復為河南按察

使明年調湖南。公素持風裁。容止威重。及居憲司。綱紀肅然。與兩院平議庶政。進退屬吏。正色諍辨。無所回撓。而嶽鞠之際。更務矜恕。常以愚獷之徒。置對鹵莽。輕入重辟。多為開示律文。引就生地。或施嚴刑。而色更和霽。虛心測論。常恐枉縱。人皆憚其剛而服其平。二十七年。坐前在河南失察屬吏贓降二級用。至京師待銓。明年春。以疾還鄉里。公少貧困。及仕。居處廉約。歷官三十餘年。家無贏貲。平生不妄取。與時人目為纖嗇。然敦重氣類。僚屬戚故。死喪孤貧。多所賑贍。家居矜厲。風槩州里。敬事三。十一年四月五日卒。年七十有三。娶許氏。封淑人。子二人。榕。照。福建鹽課大使。竣。鎮國子監生。孫二人。明年二月十九日。葬苑山新塋。銘曰。苑山之麓。釣渚之濱。蔚乎松楸。嚴公之墳。嗚呼嚴公。邦之憲臣。文靖七葉。太僕之孫。世澤孔延。大閥高門。禮官升名。

天子所甄。游歷宰守。剛明恪勤。累總外臺。濟威以仁。直道當官。恭職庇民。既耄歸來。規矩人倫。奄歎周落。懷風靡因。耿耿遺言。託我斯文。拂管濡翰。出涕霑巾。嗚呼邈矣。公其古人。

景州知州屈府君墓誌銘

府君姓屈氏。諱成霖。字起商。常熟人。其先自明初以來。皆名在庠序。以文學師授里。

中十餘世相承不衰。成化時乙酉科舉人輜仕至瑞州府推官。祖欽縣學生父永清廩貢生。府君年二十四補縣諸生。雍正四年年四十四中順天舉人。乾隆元年成進士。故事進士為縣令者吏部以次銓授。是歲

上始親簡數人以知縣即用。而府君為之首。初任盧龍縣總督李敏達公見其書生。敕知府教以吏事。及蒞政剖決皆適事理。知府驚服。五年以總督孫文定公河道總督劉文恪公交薦遷景州知州。濬惠民渠築運河月隄決堙增庾民無水患。募卒夜偵津路盜賊迸逸商旅獲甯。有大姓宗族好相訐告。府君廉知構訟主名。出教誠勵訟以衰損。八年天津河間旱飢有詔發賑異時一戶率賑二口。府君計口施賑無漏澤者。民先流亡聞賑還者續上其籍並蒙廩給。又於南門北門設棲流所以業四方流移。鄰邑聞者恨不為府君民。是時府君才望浸顯大吏方議薦拔而府君深懼盈滿因求解職。十一年遂謝病歸。初府君少有羸疾數咯血且咽且讀書因習導養術竟獲其效。比老用其術益精遂更強健家居二十年屏他書不觀惟以老莊二書自隨嘗與客談老義歎曰內丹秘蘊盡於此矣。注家莫喻微旨空復紛紜得不使柱下長蹇頽乎。性善治生能節嗇致饒益中年產益殖。府君曰財不可積也。凡遺子孫度令衣食不缺足矣。餘宜以漸散之。顧不當妄用耳。乃置義田贍宗親歲製絮袍給

道路寒者具席帽中襪等。以施囹圄。年飢則貴糴而賤出之。前後凡六千餘斛。橋道毀斷。多所修建。息曾發造安濟堂。收養男女貧癯無依者。歲可百人。府君割千畝充其費。縣東北瀕海。二十年。官築海城捍潮。延袤百二十里。多值古墟廢墜。府君募僧俗各十人。日擔積收遺骸。凡五百七十四積。悉埋丁家港義塚。其隨時施惠多此類。亦由精力強敏。綜貫纖密。故任得其人。蠹弊屏絕。又能練悉時務。通知物情。邑有大疑。多見諮訪。府君陳說利病。犁然曉析。公私皆信聽焉。廣仁局歲施棺藥。有公錢取息。既而用度日訕。衆議非府君莫能主持。府君以家錢盡償其本。屬急曾發經理。歲月滋息。七年之中。倍其舊貲。二十八年。鄉人合貲繕修學舍。鉅細之務。推府君父子規度。料量程制。周肅工勸。士悅。又虞山致道館。乾元宮。維摩寺。皆荒頽。府君發願修復。布金捨田。幾以萬計。凡所營造。靡不完固。府君春秋既高。悉以家政委息曾發。曉發雜事不復闕意。優游晏安。奉養怡適。然有節制。不事奢縱。嘗言人當歡娛時。不可無戒慎恐懼之意。一不慎。則喪其身而害於事矣。欲復樂得乎。與人交際。貴簡易質直。悉除去時俗文飾。著習是編二卷。明居家蒞官之法。末年。又集古今善惡報應為一書。號經史參同。三十一年八月二十九日卒。年八十四。先娶宜人曾氏。康熙某年月日卒。後娶宜人席氏。乾隆某年月日卒。子四人。曾發。乾隆戊午舉人。曉發。太學生。

煥發府諸生長發女四人孫八人孫女七曾孫三府君前以乾隆二十二年十二月
葬兩宜人大河先塋之左因遂自定穴次及卒之明年二月初九日曾發等奉府君
葬墓之中穴銘曰

屈之受姓維楚之裔胥宅虞山於宋之季有明迄茲青衿十世詩書綿綿氣澤淹漬
至於府君遂以昌大甲科發迹銀黃作吏寬樂令終八十有四始病羸瘠而獲久視
仕宦寔通而果於退豐財厚生而散厥利娛樂無妨而克戒畏身從化遷而有子繼
福祥濤濤亦孔之備大河之塋松檜手藝丁亥春仲良辰協筮藏魄吉兆昌厥來嗣

章烈婦墓碣

孺人姓章氏諱孔榮陝西秦安人年十五嫁張廷桂為後妻廷桂者字相如江南常
熟人父瀾陝西蒲城縣知縣康熙四十五年卒官初蒲城君與同邑魏士升友善嘗
為廷桂聘其女蒲城君卒數年而士升知秦安縣廷桂往依焉踰年所聘士升女夭
又五年士升行取改京秩從至京師士升尋歿遂歸娶同邑錢漢昭女為妻生一女
而妻卒雍正中廷桂避事復之秦安因為章氏贅壻居八年與孺人情好甚篤頃之
孺人父母相繼卒廷桂事孀解乃與孺人歸常熟廷桂貧既歸無居舍孺人盡鬻妝
具得百餘金僦屋三間居之恨不逮奉養享祀必潔及嫁前妻所生女備有恩紀夫

或遠出。自以盛年單露。常懸劍帳側。以擬倉卒。生二子俱殤。最後生一女。名催鳳。會廷桂故人。今安西道錢璽。知撫甯縣。請廷桂管記。乾隆九年十二月。廷桂病歿撫甯。明年二月。計至孺人哀慟殯絕。柩歸。與錢氏合葬縣西門外烏目墩。既窆。孺人欲投穴中。家人共持止之。孺人既無子。獨與幼女單居。家益困。夫從弟廷梅。許俟有子後。兄孺人乃鬻其居。得錢買田十餘畝。自給。而依廷梅居焉。閉戶織作。所處雖淺隘。鄰婦罕見其面。夫先入貲戶部。牒授主簿。夫歿。或購其牒。覲以冒銓。孺人曰。吾以貧故。鬻牒欺罔國家。罪也。況夫名可使有二耶。立焚其牒。十二年五月服除。莫畢。閨戶自縊。家人覺解之。防守甚至。次日既夕。守者稍倦。潛至水側。抱夫畫像置岸上。自沈死。比曉。家人始知之。見屍面。夫畫像端坐不動。時按察副使孝感程公光鉅。聞之。立往。率屬設祭。親拜其屍。上其狀。請旌於朝。報可。初孺人嫁時。不知書。廷桂時時教之。久遂通解。略涉傳記。將歿。作絕命詩詞數章。詞旨哀惻。其末一篇云。憶往事兮雙淚沾巾。想當年兮妾病沈懣。感君愛兮信誓殷勤。云妾歿兮君必亡身。嗟今日兮命不由人。君先亡兮妾豈偷存。痛萬里兮生會無因。輕一命兮地下從君。求神明兮引我孤魂。覓天涯兮不惜艱辛。得伴君兮死亦歡欣。十七年兮夫婦深恩。食糟糠兮敢怨君貧。中路訣兮命蹇時屯。喪葬畢兮不死何云。傷幼女兮失母誰親。死為君兮此外

何論。又留書與夫諸從弟曰：初聞訃，即欲死。念夫無後，無人喪葬。今日服除，一死更無別事。前議俟叔生子，為夫立後，勿誑我無後孤魂。但家事空空，無可如何。止有田十四畝，可將十畝與所嗣子，四畝與鳳如。我死棺木不可多費，我心不安。有許氏屋價十金，乞將我埋。先夫瑩次，愚嫂章孔榮手留孺人，卒時年三十四。催鳳始七歲，明年亦夭。夫諸從弟日益貧，所遺田盡廢，竟以子姓凋少。未立後，廷桂有老僕數嘗營葬孺人，不果。乾隆三十一年三月二十八日，邑諸生柏渭、吳慶長等始葬孺人。廷桂墓中，因共立碣表墓，來請余文。余與廷桂交舊，又多諸君之義，曾忝舊史，敢闕其辭。乃為銘曰：

有婉淑姿，生彼映郭。萬里遠鄉，自秦來吳。甘窮食貧，徇夫沈軀。鴈服薦醢，烏頭表閭。歷載二十，葬從其夫。垂風列女，刻銘山隅。山壤有朽，芳名不渝。

碭山縣教諭謝先生行狀

先生姓謝氏，諱晉，字日三，蘇州常熟人。祖爾綱，父錫蕃，贈文林郎。康熙十九年大水，歲饑，先生祖為粥食餓者。時先生年五歲，進曰：糜薄恐不飽，又不得懷去，不若易以餅。祖大奇之，即從其言。全活甚眾。年十七，補博士弟子。試輒高等，及入成均，屢冠其曹。年四十九，中雍正甲辰科順天副榜。又三年，中丙午科順天第五名舉人。會試取

明通榜歸教授於家。先生為人和平樂易，篤於倫理。居家常以孝弟敦厚為教。侍母病，衣不解帶者。經歷年載，兄毅字心遠，邑庠主事，發字叔起，而長舉人，推肥處瘠，發於中誠，友于式好。至老無間。從弟子景運、幼孤露育於先生，提携成立，視均己子。少受業同邑陳溥，及陳歿，為造塋冢，與同學五十餘人，執紼送葬。其篤於誼如此。在場屋三十年，經史古文，手自抄撰，研精探索，寒暑不輟。為文章，清詣充實，理法純密。既魁京兆，所試墨義，遠近傳誦。及歸，從學者日進。先生指示程準，剖析奧窔，誘掖不倦。多所成就。乙卯丙辰之間，舉場文體一變其舊，末學膚受，不循其本，競構詭異，冀以逢世鄙忽先進，目為常譚。先生教人，常隨時適變，而不失其正。執經之士，前後百數。二十餘年，登科第者相望。門墻之盛，同時罕及。乾隆五年，年六十五，由丁巳明通選授徐州碭山縣教諭。碭之諸生，積為隸役之所魚肉。先生至，所以扶樹之甚力。時患蝗，縣令教諸生各出掩捕。一生病不出。隸輒迫辱之。先生謁令，令方憂蝗甚。先生曰：隸之害民，酷於蝗。蝗易除，未足憂也。令為稍戢其隸，又于生者納租已畢，隸猶索錢不已。大見詬辱，反誣生以罪。令怒，將笞生。先生曰：徐之，且勿盛怒。令恚曰：師何意罪我？以怒先生曰：喜怒哀樂，情也。人所當有。苟發而中節，則怒亦和耳。令意解，乃釋于生。方是時，隸役橫甚，士之富厚者，必以計攫其資。貧者或恥為之下。即立其罪名，恣

意凌折之。薄物細故。皆成瘡疣。搆飾疑似。詞牒旁午。先生深不平之。後大司成崔公紀來督學。司成素方嚴。先生因上謁。極論其害。乃令諸生嘗見枉陷者。悉以上自列學政。學政下其事教諭。先生一一直之以上。司成大怒。飭郡守按驗。諸姦猾悉伏其罪。士氣為之一振。於是諸生恃先生若慈父母矣。先生在碭山八年。訓課不倦。貧者恒賑給之。有汪鳳翥者。幼孤。黃圖文者。本農家子。此兩人尤貧困。以童子來請益。先生招致官廨。衣食而教誨之。三年皆補弟子員。先生嘗受郡記。與令分道捕蝗。當至南鄉。禱於猛將廟而往。於是羣飛蔽空。聲如殷雷。乃命召徒衆掘溝塹。設置網具。竿槎須黎明畢會。及旦視之。蝗盡墮地死。數十里無一飛者。士人陳鳳卜家有孤巢。巫祝禱祀。莫能祛祓。先生至。揖而祭之。命虛一室處焉。自爾寂然。家以獲甯。乾隆十二年。先生以老乞歸。牘屢上。郡守定公長以先生尚強。堪任職。疑有所齟齬。遣教授從容問所以。欲去官意。先生慨然曰。吾年踰七十。幸筋力尚健。顧我兄弟三人。弟以計偕。得數過此。兄耄矣。獨不能來。念相見無時。何能貪顧微祿。使白首抱桓山分飛之恨乎。郡守為感動。乃許焉。先生既得請。以是年六月束裝。諸生更留行。復居月餘。比發。生徒傾邑送于河干。服青衿而列拜者。三十里不絕。初先生出行城南。遭子母相毆者。停肩輿問之。其子傲然曰。素非相屬。能難我耶。先生怒。執而撻之。命縛送縣令。

治其罪。其人始懼而求免。先生為開示大義。反覆訓諭而去。縣令聞之。晨造先生。自以化導無素。引咎愧謝。後其人感悟。更為善良。娶妻成家。供養有加。聞先生歸。母子追送出郊。鄭重拜謝。縣令者三韓鄔君。名承顯。嚴猛有吏幹。先生與爭諸生曲直。數相抗不快。然察先生所言公。後更見敬信。命其子受業於先生之子祖庚。遂相與結交。先生家故貧。居頃之。祖庚以舉人選授處州雲和令。雲和富人坐法當抵罪。走常熟。行錢先生。先生正色拒之。凡再至卒不納。數教祖庚宜務廉慎。勿勸法。亦終不言富人事。乾隆十六年。恭遇

皇太后萬壽。推恩中外。先生以祖庚官封文林郎。祖庚在雲和五年。以勞次調甯波奉化令。未數月。有獄因病死。其家請而殮之。坐不檢驗奪職。先生聞。未嘗戚戚。乾隆二十二年。翠華幸吳越。先生年八十餘。父子迎道側。進所著

聖諭十六條衍義。詔賜先生假一端。復祖庚官。初先生年十五。多疾患。母黃夫人誠曰。汝血氣方浸長。而羸瘠若此。一不慎。恐旦夕不自保。先生受誠。加意攝護。弱冠以後。體更充實。竟獲遐壽。既耄。飲噉日進。齒牙未嘗動搖。後進以文字請業者。手披口講。無厭怠。如壯盛時。庚午壬申。祖庚連充浙江同考官。迎先生至錢塘。既撤。祖庚率其門生謁見先生。捧觴上壽。侍遊六橋。先生鬚眉皓然。策杖登陟。彌日欣暢。

曾無倦色。自先生去。碭山歸。優游家園垂二十年。安分忘貧。以文自娛。壽考康強。儀型縉紳。四方士友相見。必問勉廬無恙。爭欲知其起居服食。共相傳說。以為稀有。勉廬者。先生所讀書室也。乾隆三十年閏二月初九日。無疾卒。年九十。先生娶姚氏。先生卒。贈孺人側室陳氏。以子貴。封孺人。子一。即祖庚。乾隆戊午舉人。浙江奉化縣知縣。孫二。曾孫四。先生以醇德宿齒。為鄉黨之所尊事。文章行誼。皆可表見於後。宜請當代哲匠。刻畫碑誌。垂耀泉壤。及載郡邑志乘。使來者有所考信。觀法齊肅。幼以愚嘖。忝侍函丈。敢就聞見所逮。參以先生所著年譜。撰次梗槩。冀備採擇。謹狀。

揚雄不事王莽辨

姚範

明世泰和胡正甫辨揚雄不事莽。焦弱侯作筆乘。采其說云。雄來京師。見成帝。年四十餘。自七十餘歲卒。距莽篡之日。年當百餘。不應尚校書天祿閣也。又云。桓譚新論。雄作甘泉賦而死。則卒於成帝時也。汪編修琬續索亦載之。疑而不辨。可謂疏矣。雄傳既本雄自序。孟堅去雄數十年耳。漢書成於班氏父子。叔皮生與雄接。豈有妄也。雄云。孝成帝時。客有薦雄文似相如者。上郊祀甘泉泰畤汾陰后土。以求繼嗣。正月。從上甘泉還。奏甘泉賦。按漢成帝即位。永始元年十二月。作南郊。罷甘泉汾陰祠。至永始三年十月。以皇太后詔復祠。是時漢成在位十九年矣。永始四年正月。始行幸甘泉郊泰畤。元延二年正月。復行幸。三月。遂幸河東祠后土。是年冬。幸長楊宮。從胡人校獵。雄既奏甘泉賦。又云。三月。以祭后土。奏河東賦。其十二月。羽獵。雄從作羽獵賦。事皆在元延二年無疑也。漢成在位二十六年。建始河平陽朔鴻嘉永始元延綏和。凡七改元。四年一改元。惟綏和次年帝崩。僅二年耳。以次推之。哀帝六年。平帝五年。王莽居攝三年。莽建國五年。建國二年。尋莽以獻符命死。雄以天鳳五年卒。年七十一。建國二年至天鳳五年。當九年。上推雄來遊京師。當在元延元年之間。年四十一。投閣之時。雄年六十二。安得年百餘也。雄事較然不誣。焦汪二君號博雅多聞。不

一置辨何也。又雄自云。哀帝時。丁傅董賢用事。雄方草太元作解嘲。又云。賦近俳優。輟不復為。而譚思渾天。則太元之作。當為雄四十以後之書。桓譚親從受太元法言。則當据雄傳以辨新論之偽竄。不當据偽者以辨真也。且新論肅宗嘗令班固校其書。亡琴道一篇。豈有載雄死事。與己書搭不及知者。則後所傳新論妄也。然則劇秦美新。及法言頌安漢公。俱雄自為之。無可疑者。王介甫云。劇秦美新。谷子雲作。谷永當元延元年。為北地太守。歲餘。以曲陽侯根薦為大司農。又歲餘死。永不及王莽之篡。其所黨附王音王根。非莽也。王莽之篡。永之死久矣。雄之書。好者匹於五經。不廢其言可也。宋人至以事莽不悟於聖人。嗟乎。莽為聖人所許。則亂臣賊子。接迹於世。何不可設一說以自解也。當莽之末。建武之初。蜀多高節卓行之士。如譙君黃。李業。任永。馮信之徒。皆是也。是數子者。雖偏至。然成名立方。足垂後世。何必太元法言而後著哉。

書史記六國世表序後

篇中皆用秦事為經緯。以諸侯史記及周室所藏。盡滅於秦火。所表見六國時事。皆得之秦記也。獨舉三晉田齊。以是表踵春秋之後。燕楚舊國。事具春秋。且亂臣竊國。冥然不討。而中原盡為所據。此世變之極。天下所以競於謀詐。而棄德義如遺跡也。

秦之德義無足比數而卒并天下乃前古所未有故求其說而不得者或本以地形或歸諸天助又或以物所成熟之方宜收功實而不知秦之得意蓋因乎世變是何也以謀詐遇德義則民之歸仁沛然誰能禦之以謀詐馭謀詐則秦之權變非六國所能敵其成功非幸此所謂世變之異也世變異則治法隨之故漢之興多沿秦法昔三代受命相因孔子以為百世可知秦始變古而傳乃曰法後王何也孔子之所謂因者禮也天不變道亦不變遷之所謂法者政也政必逐乎情與勢而遷近己而俗變相類論卑而易行乃情之不謀而同勢之往而不反者也故遷之言亦聖人所以不易也其誦學者以不道秦事為耳食蓋深感世變而詭其詞以志痛與

張北軒涉江畏語詩序

北軒暇日自其故積得國初邑人吳君所著涉江畏語一卷因綜其家乘陳范二夫人之行為詩一首而剗剗以傳嗚呼明季寇亂之禍披殘屠夷書籍以來蓋未有比者當是時吾邑以蕞爾之區屈於光黃廬毫之間獻賊三至城下塹而攻之數十日訖不能拔力屈而去余嘗歎息以為是雖當時士大夫城守有方抑亦禮義風教足以相維而草澤之民烝然自勵以從上之教者眾也北軒先世席膺華臚於太平之日二夫人者慮不外於酒漿箴管非預籌海內鼎沸為禦亂之計者也一旦亂作

以一綫之孤。為宗祏所繫。婦姑倉皇謀欲脫於兵戈。蛾聚之餘。又以其身為可死而不可出。求姻交如吳范二君者。以孤屬之。二人又以為義不可委。受而不辭。卒用輟轉崎嶇。以免於難。嗚呼。可感也已。嘗謂天下死生禍福。惟君子能度於義。而徐聽乎勢之所轉。陳范二夫人者。以婦姑守一室。以死自誓。不祈倖生以苟免。蓋其志夙定於中。而習於義理者明也。士大夫值倉卒之際。往往不能固其操。而溺於挫辱。終不克振而死。聞二夫人之風。可以愧矣。寄一方之任。值奔竄流離之會。不能濟人之孤。又感於顛隲。而因以為利。聞吳范二君之風。可以愧矣。北軒易直愷悌。好為歌詩。詩千餘篇。皆行於世。而於先世之軼行遺美。尤數見於篇章。誦其詩者。可以知其仁孝之篤志也。

朱公墓碑記

去縣城之西二十里。曰石井鋪。地志有曰朱公墓者。即漢司農邑之墓也。按班氏漢書。邑初自舒桐鄉。當夫官至大司農。病且死。屬其子曰。我故為桐縣吏。其民愛我。死必葬我桐鄉。及死。其子葬之桐鄉西郭。民共為起冢立祠。蓋今之縣治古屬舒。邑舒人也。自三代衰。王政缺。中更暴秦。先王治民之具。一切掃地盡廢。更數十年而漢興。繼秦治者。漢最近古。當世居官者。率以勤民奉職為務。國家亦歲以民事察其治課。

以為殿最。迄於昭宣之世。吏道彬彬。循良之聲。幾侔於古昔。故下至嗇夫之卑。亦能自舉其職。至於惠義薰蒸。漸被於民。雖死而不忘也。嗟夫。後世之吏。大者或治一郡。次猶一州一縣。考其治。僅若傳舍。視其民。不啻秦人之視越人。求傳所稱循吏之治。何可得耶。墓亦已不可辨。居人尚指延山之凸者。以為記。不知其是否也。雍正八年。邑人某傷馬牛。踐於其旁。乃買碑以為之識。夫以嗇夫之卑。行其治。以成一鄉之俗。至於既沒。奉嘗思之而不能忘。迄今二千有餘年矣。鄉邑愚氓。考其遺蹟。不忍牛羊之踐踏。此所謂三代直道之不忘者。非邪。又況於先王之治。德化訖於宇內者哉。嗚呼。其可感也已。

書練子甯先生金川玉屑集後

彭坊

烏乎。此新淦練子甯先生之遺文。而臨川郡丞王佐輯之以行者也。集凡六卷。余得之吳山書肆中。亟攜歸讀之。既終卷。作而歎曰。甚矣先生之文之似方正學先生也。先生之大節。既與方先生同。駕風霆而光日月矣。顧其文亦復相似。蓋先生之文學韓。正學先生之文則純乎韓者也。當時人稱小韓子。獨是先生初不以文名。後遭成祖厲禁。又無門人有承誼者。冒死為之藏弃。故所存無幾。今集中僅得文三十三首。詩七十八首。而方先生自其少時。即以文名天下。又開門授徒。人爭為之藏弃。迨厲禁開。而文亦稍稍出矣。故遜志齋集多至千二百篇。今人皆知方先生之文。而不知先生之文。職是故耳。方先生之文原本六經。嘗得作文之法於宋文憲公。文憲得之柳文。肅吳立夫諸人。其師承所自。上溯攷亭。而先生則不學而暗與合。其資稟殆有過人者矣。當先生與方正學同朝時。正學亦亟稱其多學而有文。嗟乎。成祖能糜爛諸臣血肉於一時。赤其族而殄滅之。無遺種。而卒不能使其文不傳於後世。而當時之人。既為之冒禁以存之。復為之咨嗟歎息以傳之。此以見忠臣義士之氣。常浩然流行於天地之間。而天理之在人心。有不可一日而泯者。嗟乎。先生之族也。坐死者五百有十一人。遣戍者復數百人。正學之族也。坐死者八百餘人。其刑也。七月乃止。

嗟乎。古甯有是哉。竊嘗論成祖以篡得位。其後致治。幾與古英主比隆。而當其斬戮建文諸臣。殘虐慘毒。殆百倍於桀紂。他日榆木川之崩。野史有異詞焉。雖其說荒唐。不足信。亦足以見人心之抑鬱不平。而故為謗詞以厚誣之。聊亦洩其憤悶之氣耳。他日成祖又曰。使練子甯而在朕。亦當用之。此則其本心之明於事過氣平之後。有流露於不覺者歟。余又聞先生父伯高先生。當洪武時。以起居注直言忤旨。謫廣德州同知。則先生忠義蓋亦本家教而然。而先生幼與金幼孜相善。嘗謂幼孜曰。子他日必為良臣。我其為忠臣乎。其謁余忠宣公祠詩也。有曰。我亦有懷追國士。為君感慨莫極。豈古所謂志士不忘在溝壑。而先生又別有默見於先者歟。至若臣林外記謂先生有後在長樂。天啟時敘忠臣後裔官。其孫夜夢先生來譙讓。無何其孫死。此其說頗詫異。余不敢信。